

建齋辨園文錄

斌丞署尚

健高研園文錄

翁公韻

序

往余在滬與陝西諸友尋論當世人材因訪其伏處奇士聞
富平楊紀五治團有聲而心識之二十一年奉職西行道出
長安欲訪其人而惜其已逝已前年從政此邦多士盛譽東
四團謂能守成法勿替聞有遺書未刊佈其鄰縣辦團諸人
各欲傳抄以相師效亦有謂人存則政舉書固不能以自行
者會富平縣長上言古以鄉先生歿可祀於社宜爲楊君建
祠依陳實故事允之且使求遺書已而楊君之弟洽百使其
子汝振持君治團諸文稿以來具言君之學所本其治團非

有書也恆命汝振曰農民者庸人告農民相與治團者庸言庸行必先盡其在己必我先有所不爲必以人情爲田寇盜亦人耳無不情者不信乎親不獲乎朋友食不足無恆皆不可以庸民不畏死徒法何足以畏之故其治不在書欲攬此書者衆矣懼失先君意卒卒未敢編定幸企政府主持刊行特不敢以私請嗟乎汝振賢哉此其言可概君之意矣令甲今雖數更苟得其意何嘗不可卽君所爲治團者以用諸聯保乎夫跡出於履而不成履君子託言於書不如見諸行事湯武革命其事同而言則異安石始倅終相其爲政同而續

則異厲王革典以至周召共和其所履者同而其所由之跡
則異也不龜手之方值猶百金耳或以戰勝或以泝澣統汝
振集錄君所治事之言豈不在攬者自得之哉惟所編次宜
有真旨因屬吾僚友之與君同縣而又夙知君者條第定之
余聞富平先正李石疊先生以文武材通古今學其巡撫山
東時用戚繼光法躬導沿海居民練團防倭旋推及齊魯全
境稱盛治洎調任河南復令民結團雜保甲法中制陸渾山
寇措置未竟賣志遂歿又聞富平名宦江龍門先生風流倜
儻號能知兵值回匪陷破鄉團之後乃用保甲編團練村堡

自爲城守遠近相聲援竟回捻迭乘無所害終以盡瘁墓祭
至今此兩公佚事熟在縣人口耳而皆惜其文字無辦團著
作今楊君參之他文字不具論獨此治團遺稿纍纍賴汝振
以無失繼志述事故人樂有佳子弟也何遽古今材不相及
乎審此所編旣得見楊君之眞余又何憾來是邦之晚也遂
題序之民國二十五年冬十一月邵力子

後序

富平楊健齋辦團文錄五卷東四團紀事一卷前省政府委員會主席邵力子先生以屬其僚友所爲編也往者健齋治團有聲實用保甲法其所爲大事惟祀與戎所爲兵農禮樂政教合寓於一以鳴其學則陝西於宋以來之舊也邵先生惟取其保甲爲團云爾事旣彰而法易效使人明其所以則隨事得而變通之苟能慎微中才以下可與爲治矣審削編竣會抗日事起未及付印遽已解任佚稿復出重憫成勞乃具本末以白於今主席孫蔚如先生許爲印行猶夫邵先生

之志也備軍方亟校讎告歲且道卽事之艱因以念世之覽
者如或取則焉夫亦安知其通變以效於用也仁智之見果
何如乎姑記其緣起於此二十六年十二月杜斌丞

例言

一向來各縣民團不與保甲合辦惟富平東四團始終以保甲法爲主樹立兵農政教合一之規模此編所錄即在揭示此旨是以獨於規約悉錄原稿不加去取冀便採用

一原稿概係因事而發隨時補救施設既非先立計劃亦非事後補苴爲存其真特注詳年次

一原稿文字間有冗贅編錄時略爲裁省其或一事屢作每歲必舉之文則惟擇錄一二用示此編不尙空言之旨

一原稿並無紀事難見辦團經過之蹟特轉屬編述紀事揭於錄端其編述非出一手間有所嫌宜予纂正閱者諒之

一茲編三經修訂裁剪汰淘僅存原數十分之四至其傳人之作行狀志碑傳

誅及原稿所附諸名人序跋應列楊氏家牒者皆不及載因其非本編之旨故也

一茲編纂印事閱二年中更十二月十二日事變佚失久而復獲是以倉卒付印爲顯其人學術根源特檢附論學示子書俾見辦團成事之故

編者附識

健齋辦團文錄總目

序

編例

遺墨

附論學書示汝振

卷首

富平東四團紀事

健齋辦團文錄卷一

治團概論二十四篇

附論二篇

健齋辦團文錄卷二

(規約)

初訂簡章 宣統三年冬

初辦約規 宣統三年冬

就職約言 民國二年

團制 民國二年

團令 民國三年

警號 民國四年

操場禁令 民國四年

警聞救應辦法 民國四年

團防急務六款 民國五年

設防四則 民國五年

第四區團章程二十條 民國六年

門禁規則 民國六年

清查戶口造冊辦法 民國六年

隊棚條規 民國七年

條禁六則 民國八年

值年春令四款 民國九年

鑿井灌田規程 民國九年

善俗大綱三條 民國十年

旗制五則 民國十一年

社倉章程十條 民國十一年

健齋辦團文錄卷三

(申告)

開辦東四團曉告 民國二年

愷析利害曉告(附十禁) 民國二年

禁竊秋禾 民國二年

告到賢鎮查夜 民國二年

告各團冬防 民國二年

通傳開操儲備 民國三年

告到賢鎮店戶稽查奸細 民國三年

告各團戒備 民國四年

禁拾麥行竊 民國四年

申告到賢鎮捕盜 民國四年

約警救應告 民國五年

聞警告慰團民 民國五年春

禁造謠撓公 民國五年

兵後申告嚴防 民國五年

責成鄉牌打更捕盜 民國五年冬

初辦第四區保衛團曉告 民國六年春

初蒞區事告各團 民國六年

告崇儉團 民國六年

告崇勤團 民國六年

通傳農隙講武 民國六年

禁阻賀歲告 民國七年春

敬天睦鄰告

民國七年

收穫時稽查奸細告

民國七年

守夜戒賭告

民國七年

告維新團斂抑團丁

民國七年

通傳舉辦講演

民國七年

勸寓客催納正賦

民國七年

通傳籌辦社倉

民國八年

通傳植樹

民國八年

告到賢鎮輪班值防

民國八年

禁在外團佃種洋煙

民國八年

禁窩留種煙客民

民國八年

禁攜槍刀

民國八年

嚴禁到賢鎮賭博

民國八年

探報匪警飛檄各團

民國九年

辭職告各團

民國九年

申告到賢鎮儲倉

民國十年

禁販煙告

民國十年

革汚俗告

民國十年

釐定差車告

民國十年

禁商戶高抬市價

民國十年

申告輸賭准賴

民國十一年

爲交口兵變通傳戒備

民國十一年

查拿冒名鬧欸并禁習硬肚 民國十一年

禁兒童戲錢 民國十二年

告司義柱 民國十二年

防匪劫告知新團 民國十二年

清查莠民不得入籍 民國十三年

嚴禁偷樹 民國十三年

撤兵防禦通傳 民國十三年

告修禮村體恤殘廢 民國十四年

令到賢鎮佈置城防 民國十四年

通傳矜恤鰥寡 民國十四年

催設自治所 民國十五年

禁窩販婦女

民國十五年

催埋露櫬

民國十五年

告慰各團僑客

民國十五年

禁各團凌侮寓客

民國十五年

整理學務告

民國十五年

飛傳派兵把守要隘

民國十五年

申令到賢鎮修築中心炮樓

民國十五年

省城圍解倡賑通傳

民國十五年冬

議加隊丁餉糧

民國十五年

勸戒驕盈體恤客民

民國十六年

通傳慎備事件

民國十六年

禁收女徒惡俗 民國十七年

禁到賢鎮寓客賭博 民國十七年

預防飢民搶糧通傳 民國十七年

申令各團籌賑 民國十七年

通傳先賑鰥寡孤獨 民國十七年

通傳賑貸年關食糧 民國十三年

健齋辦團文錄卷四

(書牘)

爲到賢鎮被掠伸枉稟 民國三年

復陳副官立齋 民國四年

致陳副官立齋 民國四年

致雷禹門 民國四年

與到賢鎮雷某 民國四年

爲設區倉立案稟 民國五年

致富平縣知事 民國五年

復富平縣知事 民國六年

復李縣佐渭川 民國七年

致田師長潤初 民國七年

致張知事虎山 民國七年

與李子平張伯疇 民國七年

覆崔旅長式卿 民國八年

爲知新團求降等行差稟 民國十年

覆胡總指揮笠僧

民國十年

覆胡總指揮笠僧

民國十年

覆胡笠僧劉允臣

民國十年

致柏知事厚甫

民國十一年

覆康司令子定

民國十三年

與胡文軒胡玉山

民國十三年

致任旅長子陽

民國十五年

覆于總司令右任

民國十五年

覆田師長某

民國十五年

覆趙丕謨

民國十五年

覆崔式卿

民國十五年

與王尊一王恆照 民國十五年

致第三區西七團 民國十六年

覆嚴縣長翔鶴 民國十六年

覆楊任之 民國十六年

致管成菴 民國十六年

致李營長某 民國十六年

與楊伯霑 民國十七年

健齋辦團文錄卷五

(雜文)

締合東四團祀社文 民國二年

春祀合操禁疫通告 民國五年

戊午春祈 民國七年

戊午秋報 民國七年

祭張伯疇 民國八年

壬戌春祈 民國十一年

壬戌秋報 民國十一年

告事社壇文 民國十四年

丙寅秋報 民國十五年

祈雨告 民國十七年

團練樂歌 民國三年

團練歌 民國四年

教練歌 民國四年

李節婦楊氏碣

民國九年

楊貞婦王氏碣

民國十年

皇甫危齋遺思碑

民國十年

楊節婦張氏碣

民國十一年

郭受之遺思碑

民國十一年

社倉記

民國十三年

區災荒籌備分會募捐啓

民國十七年

附論學書甲子示汝振

來稟屢言身弱多病學力不進且以不識門徑要領爲問嗟乎限於天者豈果不可以人力強爲哉汝以孱軀就學遠方吾不能不爲策勵亦不忍爲責逼既恐汝以病自諉遂爾弛學而又慮汝不善用力因學增病也嗟乎是惟在爾自爲之謀自量厥力矣既苦心氣不足即須節養善用勿躁勿急勿忘勿怠勉循循日知所無月無忘其所能寬以歲月可以養心可以進學無欲速無銳進欲速不達銳進難繼於學滅躡於身致病夫尪羸在體亦在人用之如何耳寒窶之家節儉可以贍事畜疲弊之馬良御可以泛長途何也其所養之用之者有道也汝果能積義理以養其心持莊敬以養其體理爲氣主理充而氣自生恬嗜欲定心志以養其氣動息節宣起居服食各有其道其有不能調者輔之以藥力形爲神宅形完而神自暢如程子之受氣甚薄而

完養反逾盛年如孟子之集義養氣浩然塞乎天地則學且足以愈疾何學之增病人且可以勝天何病之足憂吾兒其善自試之他日有得當信是言也若夫學問塗轍非隻語所能盡既有問矣何可勿告蓋聞道之大原出於天道之實體備於己道之發用燦乎日用倫紀之常道之工夫切於身心事爲之著道而不本於天理民彝則悖異之歧途學而不切於日用身心則謬悠之僞士是以聖賢垂世立教必首明道之本原先自其原於天具於性而不可離者警覺言之以動其戒懼操修之本

自天也者理而已具斯理者氣而已存是理與氣者形而已故天地者

一有形之太極也太極之中萬物涵育如嬰兒之在母腹理以賦其性氣以成其形呼吸動靜息息與母相通子氣一乖母即不能安矣焉可毫髮違其性誣其覺哉又常論之天地之狀如卵然清者其天

黃者其地天之氣包舉乎地之外而升降乎地之中地面即天絕無

空隙

特其氣最清近之覺無所見必至於高遠而後覩其蒼蒼譬如人行於雲霧中身之左右猶無所遮稍遠則目爲所蔽進而稍行回視過來之處則又迷

替而無所窺彼雲氣濁故其遮至近此天氣清故必至遠而後見其跡

人處天氣之中如魚在水涵泳濡煦

養於外呼吸吐納淪於內身中氣與天相浹心內理與天相通一念之公私邪正一事之作止語默天無不知而無不覺體乎自然不待明察蓋吾心中之理即天悖乎理即逆乎天吾所知即天所知也人止知高高在上之天而不知吾身心自有之天人止知玄默幽遠之天而不知陟降監臨接於吾之精神念慮者無一非天是以雖有天而不知畏雖有監臨而不知懼明有禮樂幽有鬼神其理不誣鬼神者天地之功用理氣所在亦即鬼神之所在公私邪正周察森羅十目十手誠如其嚴且吾心之精神念慮亦即吾自有之鬼神吾之一

念之正而屬乎神而與天地之神相通吉即隨之吾之一念之邪而屬乎鬼而與天地之鬼爲徒殃即萃之天人相與之理可畏如此戒

懼慎獨人可須臾忽乎哉

聖賢教人畏天自盡其理雖不專爲吉凶而吉凶之道未嘗不在其內此說雖不專爲此處而發然

與此處有相裨者故附於此以足之

雖其量至於參天知化之盛而其功必始於動靜幽獨其事不越乎彝倫日用而其理必究極乎性命人天然非初學之士所易概及故必循循有矩由淺及深先之小學示以有定之繩尺進之以大學博其無窮之旨趣而其所謂無窮者又自有本末先後之不可易自古詳言爲學之序入德之門莫備於大學體道之要爲功之密莫切於中庸六經語孟散其言曾子子思會其歸朱子總羣聖之要而括之以四綱曰立志居敬窮理反身

信好錄中輯朱子言此四者語甚詳可以讀之

後之言學規者莫不本之胡敬齋加入審察克治等

語擴爲六條仍不出乎四者之意近世言學如清麓如愛日亦皆本此立

規語雖小殊其旨究莫能外焉

愛日八目亦甚詳盡特其言西學處非其正意

推此四者之旨立志

以貞其本居敬以固其基窮理以致其知反身以踐其實分之雖各有倫
緒合之則交互相資非立志則一心無主萬事頽靡而敬與知行何有非
居敬則怠肆悠忽知行無本而志於何成非窮理則事物茫然昏知冥行
而敬或淪於枯寂非反身則所驚皆屬空言而志亦無足爲道則是四者
之中缺一不可獨一不得必於交致其功互資其用而後可及然其所謂
志者必期遠大毋自菲薄必於希聖必於希賢必與山河並必不爲草木
朽受天地之中承父母之體此身不易此道必聞必有如張子之爲天地
立心爲生民立命爲往聖繼絕學爲萬世開太平而後可謂之志必有如
孟子之舜何人予何人文王我師周公豈欺我而後可謂之立志所謂敬

者貫徹學問事業之始終必嚴瞬息必慎幽獨靜而以敬直其衷動而以敬貞其度致知而以敬則聰睿寧豈有以察乎義理之精力行而以敬則心力畢振有以踐乎道義之實六經語孟言敬最切濂洛關閩語敬最詳朱子敬齋一箴包舉尤備必能如大易之朝乾夕惕自強不息而後可謂之敬必能如敬齋箴之動靜無違表裏交正而後可謂之能居敬所謂窮理者制行之本知必真知窮必極窮程子格物九條包括備賅朱子窮理

四說指示切實

四說謂念慮事爲文字講論四者

所宜詳究博求精考

程朱之說具載大學或問中可取讀之

上

而天下而倫物內而身心外而家國天下性命之源禮樂之奧無不當知而必以讀書爲本必能如程朱之循序致精巨細不遺而後可謂窮理必能如格致傳之豁然貫通體用備至而後可謂之能窮理所謂反身者實之於身必勵躬修必敦實踐一言一動惟道是從一物一倫惟分務盡

所知聖賢之理實體諸身所志聖賢之事實有諸己必有如張子之立心立命繼往開來之蹈迪而後無愧於反身必至如孟子之舜文純師孔周純繼閑道衛世之深肩而後能造於反身之實果能如此其真無負於天地之所生父母之所養卓然與喬嶽並而不與草木朽規模之至又何加焉然吾今者則欲更爲撮此四者之條貫而指其實地以示汝蓋嘗論天

人性命離合之機莫外於辨理欲德器醞養淺深之造必歸於理性

此情性兼

氣質而言理欲之辨在心術性情之發兼辭氣未有心氣不平而性情得其正

者亦未有性情不正而心意無私累者二者之功必合內外而一之尤必兼動靜而極之則惟敬爲要矣虞書危微執中本兼心術性情在內大易敬直義方豈是操治其外而大學之誠意以至正修中庸之戒懼以迄中和發明此意尤爲昭晰誠能於日用之間整躬持志敬畏爲主戒慎恐懼

無間動靜而必先嚴於靜雖不見聞亦不敢忽心意之中常懍懍於天命性道之不可離者拳拳服膺無一念之敢肆則此心常存此體常湛清明在躬紛妄漸少內邪不生外邪無自得入

已上言存

加以涵泳義理灌溉本源

咀味道德薰陶德性

已上言養

則所謂存養者有其基矣無事之時讀書窮理

推求事物博極吾之知識鑒別古今懲知我之病痛長養善機消融私滓潛移默化於隱隱之中若嗜其味而不能自止其讀書也尤必以古人之言語推到當前事物又必以當前事物切到吾身現行之事纖微曲折體貼深入美意良法試爲條畫務必使古人所說者隨事與吾身有益隨時與今世可行以書證事以事證書事理既明讀書益得則所謂窮理者得其門矣及夫由靜之動之際事物將接之頃念慮初萌則當慎察幾微審其意之善否察其理之是非善則發著惡即遏絕決不可稍有依違進退

致令潛滋暗長於隱微之內忽而不覺發而難制斯正人鬼關頭聖狂分

界工夫最緊要處操存舍亡此際之操持用力易而得效捷大易之不遠

復顏子之不貳過切在於是一事如此事事如此端居獨處如此稠人廣

衆中亦無不如此凡人言動莫不先有意慮萌生於內而後發之於外大學中庸慎獨正謂慎此不但靜中之意念是獨即正應事接人之際將欲言

動必先有意念隱起於內人不得知而已獨知亦是獨能於此處早自決持則所謂省察者得其要矣事

物既接之候即以其念慮之善者發於事爲善必實其善而尤必求於至

善惡必絕其惡而不敢使有一毫之留惡使夫好善真如好好色惡惡真

如惡惡臭皆務決去而求必得之以自快足於己其或意有所係質有所

偏則當猛用克治察有未逮行有失周則當勇事遷改志之高者每患才

疏則當慎務精實器之隘者多傷狹露則當力求推廓身心之務倫理之

實明新之謨道義之地隨其所在各盡其分而毋敢少虧則所謂反身者

可與幾矣能是數者則存察之操嚴而理欲得其辨矣

自注

按敬之一字貫徹始終該知行統動靜動靜二字以心言之則思慮

未萌是靜意念一生即是動以身言之則事物未接是靜事物既形即是動存養固屬靜然動時之持志馭氣敬而無失順而不害亦即存養特靜時之工夫乃其源耳省察固屬動然靜中之意念忽萌即須省察特既有意念即得謂之動耳存養關乎知讀書積理無非爲養而非存亦無以爲知故居窮理之先省察界乎行意慮初萌正行之始而非察則無以慎其行故居反身之前存養省察直貫知行到底省即省其於所存者存否察即察其於所養者害否動靜原是一源分之雖各有條緒而其用力之工夫則須是一貫特其立言不得不各從其類耳讀書須善自融會勿泥於字句之間乃爲得之至於

知行亦是交互相資知可以釀行之誠行可以驗知之理知之果真則行之必決行之實到則所知愈透而愈真切知其然且悟其所以然解書窮理制事皆如此矣

然而性情之發或有未善則尤足以爲吾身心之累所當急爲矯治而不可忽也性情者喜怒哀樂是也四者之發本於仁義禮智之屬皆心之用所不能無亦事之質所莫能外喜怒哀樂之情發於中而慶賞刑威之用行於外大而生殺予奪細而一笑一嗔德之所由規其厚薄養之所由見其淺深本其未發無偏謂之中由其發後中節謂之和常人之情心多係累私好偏惡膠擾於懷未發不能養其本然之中發後遂至乖其當然之和事有本當喜也而遇所偏惡之人則有喜有不喜且或因他人之喜之而反爲嗔目物有本當怒也而施於素好之人則有怒有不怒甚或因他

人之譏之而反恨多口即或喜矣怒矣而其所喜所怒之節與其因緣應有之施爲未能適其平而當於理不獨慶賞刑威之失其大者足以害於家而凶於國即一嗔笑間語言辭氣之僻形其私而共其偏者皆足以致憤而起離雖骨肉不免况怒之爲害甚烈或因過暴而致物不堪或以忿厲而使人難近每見人有事理雖正而出之辭氣不平遂致乖違可不知所懼哉誠能於日用之間戒慎操持存養於未發之先物欲不形使心理常湛心氣常平無纖毫紛擾讀書積理誦法古人廓其器識豁其志量養其中正和壹清穆之體消其偏迫淺狹急遽躁暴之識舉凡平日所謂藏怒宿怨忿懣好樂等意以理消遣悉拔其根不使一毫蘊伏匿爲吾心之累其源旣澄鑑空衡平一情不私一物不累如朱子所謂自戒懼而約之以至於至靜之中無少偏倚而其守不失則吾本然固有之中可以得其

養矣又能恪謹銜勒制節於既發之候持志馭氣使其心常有主意常定
靜情思初萌即自審慎察其是非可否於隱微之中以謹其幾遏欲從理
與前同功辭氣臨出審慎矜持順理稱物高下平施以軌其流毋敢過毋
敢不及喜所當喜不敢以偏好而溢其情亦不敢以偏惡而擱其賞怒所
當怒不敢以拂我而進其怒尤不敢爲徇人而佚其罰喜怒哀未來不敢因
私好偏惡而預倚其待之之心喜怒既去不敢因積怒深恚而常挾其忿
恨之意常挾此意則是藏怒宿怨將復爲後事之累喜怒在物而不在己恩威任理而不任心推
而至於凡處哀樂之屬無不如之其有不能則必力用克治雖有矯揉務
衷於是而後已積之既久廓然大公絕無容心如太空之任浮雲自爲舒
卷明鏡之照萬物不留影顏子之怒不遷程子之性能定程子定性書好學論可詳讀之

如朱子之所謂自謹獨而精之以至於應物之處無少差謬而無適不然

者則吾當然應用之和可以得而致矣能是二者則動靜之功密而性情得其理矣所謂理欲辨性情理明誠並進敬義夾持敬以始終誠以實體朱子四條之貫以斯演之學問途徑其庶幾乎雖然此特其門路耳至於窮聖賢之蘊奧造義理之極歸則在自己振奮精神勃發志氣博覽詳稽篤行實踐所事必宏遠所期必毅到充實之爲美充實而有光輝之爲大過此以往則吾未之敢言而竊爲汝願之小子聽哉吾役於世故而疏學聊以語汝其勿以此言爲易而有忽心亦毋以此言爲近而有限心高仰瞻鑽必造極頂不負天地不負所生不負所教他日有卓然而立於宇宙間曰某氏子某氏猶子則是予之厚望也夫

富平縣東四團紀事目次

緣起 沿革 區域 戶口

經費 器械

先後在事出力團員 團丁

城垣 碉樓 操練 巡防

緝捕 交涉

民五事變始末 社倉 賑飢

善俗 公約

禁煙 禁賭

公益 救災

息訟 衛生

輯僑

輸軍

弭爭

申枉

卹鄰

褒獎

富平縣東四團紀事

緣起 沿革

辛亥夏曆九月初一日陝西革命軍起義西安外縣奸宄盜竊乘機蠢動初六

日晚富平縣第四區知新團莊子鎮突來匪徒十餘人連劫連城北溝兩處地

方一無保障老幼驚惶不知所措訛言頓起長老相聚謂非練鄉團不能得

且夕安因告保正楊豐年集眾訂期初九日上廟各縣鄉間皆就本處廟宇為公所有事則合議於其中俗謂之

上廟公議眾咸贊成且曰事急矣宜速行之即公舉豐年之兄昌年使總其事

羣斬棘為戈矛自訂議之日起各堡相約守夜巡柝聲終宵不絕少壯競習

拳技歷月餘防禦諸端始粗有眉目一冬幸得無事

民國二年匪徒漸聚秋後盜風愈熾到賢鎮居民屢被搶劫行旅戒途維新仁義

坊時新到賢鎮惠店聚賢村坡頭志新西城堡三團代表王錫爵王瀚李孟祺等議與知新團

聯合公推楊昌年爲四團團總自八月始議至十一月乃決遂於初九日集
合各團首人團丁引昌年於到賢鎮大廟就職誓衆約法東四團之名自此
始

其後崇禮

流曲川襄

團因連年匪擾雖與四團西界接壤而安危殊異於民國八年

即議相聯合延至十二年冬使團紳胡德潤暨首人胡煥章胡新邦等來申
前約商訂條款報縣備案而四團之名則仍舊

初蒲城西境第三

武店蘇坊覺地
橋村共四團

第四

姚古村北姚
村一帶四團

兩分團與四團東界毗連當

大道東西之衝十餘年來久有聯防之議至二十二年三月派代表黃葆鵬

李坤祥等來申前議並與南界之日新村

北甫村

甲團互相聯絡協定簡章十二

條共同遵守名曰蒲富連界聯合團而東四團遂益固

二十年省政府頒鄉鎮編制法改甲團爲鄉縣府下令合併知新維新兩團爲

同新鄉時新志新兩團爲又新鄉改崇禮團爲禮新鄉越年三月以禮新鄉地面狹小戶僅百餘公徭常感苦樂不均乃請於縣政府裁禮新使與同新鄉合併爲一

二十三年二月縣府令改東四團爲富平縣第四區第一分團以舊時團總爲

分團長至九月復頒編查戶口保甲法重編又新東鄉聚賢村坡頭堡爲第一保又

新中鄉到賢鎮爲第二保又新西鄉惠店西城爲第三保同新西鄉川裏爲第四保同

新中鄉仁義坊爲第五保同新東鄉莊鎮爲第六保以上仍東四團及崇禮團區

域改名爲智新鄉設聯保辦公處總鄉事其時昌年歿已六年矣惟東四團

之名則猶在人口焉

區域 戶口

四團位於富平縣境中東部以到賢鎮爲中心點東界蒲城武店南皋村西界

流曲鎮北界祥豐恆豐兩團南界日新恆新兩團西南至縣城四十里西至流曲鎮十里西北距薛家鎮二十五里東北距美原鎮二十里東南距施家鎮二十里東北距蒲城興市鎮三十里

團區分南北兩大段北段東知新中維新西崇禮南段東時新坡頭聚賢村中時新到賢鎮中西志新西城堡西時新惠店修理村合計東西徑長十二里有奇南北徑長八里有奇

知新團所屬莊鎮八堡一溝界首三堡東仁義坊三堡共十五村堡維新團屬東西仁義坊共十一村堡時新團屬到賢一鎮東西共十二村堡志新團屬西城一大堡崇禮團屬東西川裏共十二村堡五團合計一鎮大小五十一村堡

五團戶口經民國二十三年調查統計八百五十六戶男女共四千四百九十

六口並列表如後

東四團戶口調查表

團別	戶數	人口		合計
		男	女	
知新團	一四八	三八八	三八九	七七九
維新團	一三三	三四五	三七〇	七一五
時新團	三五〇	九三七	九五五	一八九二
志新團	九二二	一一三	二二六	四三九
崇禮團	一三三	三五四	三一七	六七一
總計	八五六	二二二	二一五	四四九

經費

四團首事諸人始終均為無給職亦不立機關日常事務團總即於其家處理

遇大事上廟集議公決臨時招待飲食茶水均由首人自備概不公支遇出外辦事及團丁遠出送信口食並日用紙筆零星費用每年所費多寡不等二十餘年悉由團總楊昌年獨力墊支不曾攤派

總團需用經常費起於民五僅常備丁年費二百元至十六年又公立善後所亦僅年費百餘元近年以來諸費裁節僅留團丁四名年需洋壹百四十四元麥一十四石四斗以上兩項用欸均由各團倉息項下支給

每年春冬合大操時除團丁自備乾糧外各團酌給湯水雜費初時每丁一名每日發給制錢二十文後漸加至百文近年給洋一角每次一團約需大洋三五元不等悉由本團自行攤認按期結算張榜曉衆至各團每月例操概無費用

崇禮團聯合後幫認總團隊棚常備團丁經費每年洋四十元此欸儲存到賢

鎮商號公議作爲每年祀神合操及獎賞等費之用

器械

四團初辦僅團總楊昌年夙備之來復馬槍一枝抬槍八根餘聚概置刀矛殷實之家間有設置火槍者民國元年以舊火槍改成來復槍共三十餘枝每枝購配火藥二斤鉛彈銅火帽各數百粒專防緩急其平時打靶所用皆由自備不在此數

民國二年四團結合後維新時新志新三團同時增置長矛黃鱗尾來復槍各數十枝抬槍生鐵砲各十數城墩碉樓各備火藥包磁瓶炸彈數十枚

四年總團呈由陝西將軍公署及巡按使署備價購領五嚮快槍六十枝單嚮快槍六十枝共彈三萬粒（五嚮槍價銀二十一兩單嚮價銀二十二兩）散存各村堡槍價俱由殷實之家派認

六年陝督陳樹藩以四團有保衛地方聲譽特發給五嚮快槍三十枝廣來復槍二十枝各色子彈萬餘粒銅火帽三千粒洋藥三十斤

民七以後因辦團日久原有槍枝漸多破損子彈亦歷役耗費所餘無多乃於民十年勸派團內有力之家添購槍彈每枝約三十餘元經總團烙印編號此後歷年補充共計快槍一百六十餘枝

十九年冬縣政府將劉軍過境所遺五嚮快槍六枝子彈四百餘粒發給本團備用

本團槍械均係私有公用居民之有槍有丁者由物主自行執持有槍無丁者由團長牌長揀選忠實可靠之丁交給執持並令其擔負保管之責

先後在事出力團員

東四團團總楊昌年字紀五號健齋初辦知新團團防繼總縮各團艱難險阻

一切規畫指揮無巨細皆躬親爲之自辛亥任事積勞成疾至民十七年冬病益劇衆議聽其暫解團務然猶扶病籌賑以十八年二月初三日卒先後凡十九年臨終付囑團務賑務語不及私家人體其遺意葬之日賑散災氓二千餘口今雖歿已數年其施設自衛自治大體仍循前規焉 楊豐年字治百（昌年之弟清恩貢生）事兄有禮締合初舉爲副團總仍兼知新團團長艱危以一身任之无私其家財昌年既歿衆舉爲團總前規遂以弗替以二十五年二月五日卒

副團總皇甫光字子晦（邑庠生原籍白水縣人）遇事認真尤資善斷締合之初內外奔走以十年三月卒 郭萬鍾字受之（知新團人）歷年築城堡積倉儲諸繁難事務多資其力以成卒於九年三月 王錫爵字尊一（志新團人廩貢生留壩漢陰教諭）四團締合錫爵與王瀚奔走主持之力也贊

襄規畫二十餘年卒於二十一年正月 李孟祺字子平（維新團人邑庠生師範學校畢業歷任校長勸學所長）初爲團紳任外交事旋理社倉總務調和衆議留意人才贊襄二十餘年

東四團團紳王瀚字海帆（維新團人邑庠生）歷年安慰僑客講演訓俗多資其力卒於二十年五月 張作松字翼如（知新團人邑庠生）鄉衆多爲其門弟子其團團防初設得其片言事以立辦民四年卒 張九錫字伯疇（知新團人邑庠生師範學校畢業）對於內外諸務甚得其力以八年十一月病卒年僅三十九 王廷相字巨卿（到賢鎮人邑庠生）以和靄集事尤善調解十九年卒 楊靄字伯霑（原籍華陰）於善後事多所贊畫卒年七十三 劉復善字慶堂（知新團人）初任本團保正治錢穀繼爲團紳十餘年始終如一 趙常伸字伸之（縣學生員原籍三區崇豐團寓居到賢鎮）

二十一年被舉遇事負責

東四團督隊王自成(知新團人)巡防緝捕近二十年始終得力

東四團巡查趙孝義字盛亭(知新團人初從張中將義安爲營長)十八年被舉於職責外尤能調和衆議二十一年歿於疫 楊發魁(知新團人)歷牌長保正等職治錢穀外於巡緝尤資得力

知新團保正王昆海襄辦總團事務艱危之際始終一心民七年卒 維新團

保正徒單立績勤於操練巡防十年不懈 志新團保正王致祥倡捐鉅金助修堡城十一年卒

時新團團長劉震字東初遇事委曲求全輸糧助賑捐修鎮中炮樓改任鄉長後仍贊襄團務 崇禮團團長胡煥章字文軒築墩設防勤於訓練十八年卒

時新團總約楊樹盛（惠店人）任財不苟尤善解紛十六年卒

時新團副團長楊天福（惠店人）任事二十年防守無失築墩積穀尤所倡率
二十一年改任鄉長 崇禮團副團長胡邦新築修碉樓勤敏巡防十六年
卒年僅四十

知新團右哨牌長劉興都戢內訌禦外侮從事甚勤年僅三十以疾卒 知新

團前哨牌長張建 兼任教練勤勞得力 時新團牌長王欽德（聚賢村
人）團防城倉始終得力

團丁王德茂時新團人死於民三北洋陸軍何團過境之變張成義知新團人
趙長寧王有懷維新團人死於五年陸軍陳旅常營之變於民十年冬錄四
人死難功各於其地樹名表彰之其職員故後遺思在人碑表不沒者皇甫

光郭萬鍾張九錫王錫爵亦四人焉

團丁

四團俱係民丁集合分職務爲兩種少壯則操演巡路及傳遞消息等事老弱則打更坐夜瞭望等事平居無警則挨戶按丁輪值打更老弱孤寡酌量免其坐夜民五以後因到賢鎮對於城防人情渙散迄不實力奉行乃規定分班行差之法分爲三等富者出錢兼出人力則十家爲一班貧者只出人力則二十家爲一班更貧者少出人力則三十家爲一班每日每班各出一人應值周而復始其有分四五班者依此推類

民五年夏匪患愈烈各團農民舍耒趨事每感困難適有緝拿常劉二匪之事遂合議設置常備團丁十一名專供緝捕及遞傳號令每名月給制錢六千文按團等級由上中戶分認六年減去三名十年又減二名僅留丁夫六名十四年以糧價日昂銀價大漲公議以制錢六串折洋一元每名月給三元加

發小麥一斗五升十五年後因前所規定錢麥不足用復議再加小麥一斗五升共三斗由倉息或公欸項下支給遇有不敷或無的欸時仍由上中戶分認彌補

城垣 礮樓

辛亥冬十月補修槐園堡城

堡爲昌年所居團中事務均就其家治理之不另立機關舊有堡城歲久盡圯緩急無所恃乃就廢垣缺者補之卑者增

之周四百餘步高十五尺元年正月竣工費六百餘金悉由昌年獨力擔任暨各戶幫助以成之

民國二年冬到賢鎮補修城垛

時新團聚賢村築寨垣

維新團太和堡築

寨垣

三年冬時新團惠店趙堡築城成

維新團李堡築城成

四年春築莊鎮大廟圍牆

廟爲本團操演集合地兼值東西大道因築修圍牆百餘堵並於廟之東西中各修墩樓一座

知新團連

城堡築修圍牆並墩樓一座

五年冬增修槐園堡城堞

先是辛亥之役僅築圍牆而已至是重修加厚八尺高三十尺並增建墩五座雉堞三百餘堵共用麥一百二十餘石費銀六

百餘兩共計一千八百餘金仍由昌年獨力捐任

六年冬知新團王堡補修城樓一座

維新團北頭補修高樓一座

知新團

界南堡築修圍牆一周並墩樓一座

七年春知新團界西堡築修圍牆一周並墩樓一座

冬北溝築墩一座

八年春知新團劉西堡補修城樓一座

冬知新團劉東堡補修城樓一座

九年冬志新團築修城堞

志新團在到賢鎮西門外數十步城垣過大歷年補葺均屬草草本年秋雨足豐收總團乃令築修城堞由保正王致祥倡捐

鳩工六閱月而告竣周二里有奇高二十五尺城始堅完

時新團坡頭堡築修墩樓一座

時新團辛家莊

築修墩樓一座

維新團太和堡築修圍牆一周

十年冬知新團界西堡補修圍牆一周並墩一座

維新團趙堡築墩一座

時新團惠店築修大廟圍牆一周

時新團孫家莊築修墩樓一座

十二年冬時新團修禮村築修大廟圍牆一周 時新團惠店楊堡築修墩樓

一座 崇禮團築修胡祠墩樓一座 時新團惠店張村築修墩樓一座

十三年春崇禮團李社築修墩樓一座 宋社築修墩樓一座 胡家村築修

圍牆一周 維新團西徒村築圍牆始成

十四年冬維新團惠家道圍牆門樓成

其村自民國八年築城半壁因事中止總團屢催修葺罔應至是始協議補修圍牆並築樓門

焉 崇禮團宋村築修墩樓一座 時新團惠店村築修圍牆一周

十五年春時新團修禮村大堡築墩一座 冬崇禮團西宋村築修圍牆一周

崇禮團西李村築修圍牆一周

十九年春知新團義和堡城成

堡原名道裏舊無城基又當汽車道自軍興來總團屢催修築圍牆迄未實行至是兵荒交迫拉牲頻仍遂集

議提舊存廟款築修城垣高二十五尺四閱月而竣事

二十一年春到賢鎮中心炮樓成

其鎮城垣過大自民國四年總團屢催築修迄未興工至是時變頻危乃由本團團長劉震捐資修築高

三十五尺
徑十五尺

各團城牆墩樓二十年來次第修築興工多以農隙富者出財貧者出力計築城者八處修圍牆者十三處建墩樓者二十三處而城墩尙不計焉

操練 巡防

四團成立議以到賢鎮爲總集合所規定春秋兩季農隙之時各舉行合操一次各團每半月舉行例操一次操時先演長矛次演快槍最後打靶遇有因事專操校閱則按事實情形臨時集合無定期

打靶用土槍鉛彈輪日輪哨演習五日一徧各哨彼此互相監驗每月五哨同在操場合打二次以較優劣賞罰有差

平居無事時各堡打更坐夜每晚二三人輪值分配丁壯老幼以次遞差各哨按其巡籤互相糾查遇緊急有事時加丁加班且於白晝派丁把守城門兼

司瞭望諸事

考成責任無論有事無事於打更瞭望巡哨均由各團首人負責梭巡查出團丁失職即予責斥某團某日失事即由該團官人及值丁負賠償暨緝捕之責總團仍不時派人加班抽查而於到賢鎮則尤加意查詢日奔走焉到賢鎮及西城堡兩處城大門多防守頗費人力每至農隙即將其衝道之門封砌只留一二偏門派丁把守歲以爲常

每遇年節團防較平時加倍注意偵查面生游閑之人探詢來客職業底蘊每堡於除夕前一晚商定輪班應差各員丁並各分一半守望換替出門

民國二年冬立巡路會哨法每哨每晚在本團境內巡查一宵各哨依次輪遞周而復始四團巡會亦如之有事則依次於白晝亦行之

臨時集巡以四年三月之役最著功效其後遂踵行不廢彼時匪首某聚衆於

流曲北之月窟山全境人心震恐總團集合各團丁臨時排隊親率巡遊每至一團或其界上輒發槍一排警戒備禦如是者旬餘至匪潰散始已

緝捕

辛亥九月十一日晚知新團北溝突來匪徒十餘名衆放土槍轟震匪驚逃去民國元年六月韓城商人路經到賢鎮城外被游匪數人所劫總團派丁逐捕至知新團東界獲之追還商人資貨護送出境以匪係初犯薄責而釋之二年九月山西商人販煙土六包經到賢鎮城外被冒充軍隊之游匪所劫總團聞報派丁拿獲將被劫煙土追還護送出境團衆請戮匪以張聲威昌年不可嚴斥遣去

無賴漆柿子磴子等當四團團合之初經曉告後已斂跡矣閱時二年冬忽於其所居之鎮城中夜間劫人總團聞報集衆兜拿當場將漆柿子格斃呈縣

備案

三年二月白水巨匪於到賢鎮西門外搶劫行客牲貨總團聞報派丁馳往圍捕獲之追出被劫各物使原主領回匪哀詞乞宥責而釋之

四年六月無賴腸子搶劫到賢鎮雷姓寡婦傷人逃逸團衆追捕格斃報縣備案

十二月晦蒲匪張某等十餘名過境爲知新團巡路者盤獲環跽乞宥報告總團查其未在四團境內肇事戒斥釋之

有匪號從洋在崇禮團屢犯大案久捕未獲十三年八月復在四團界內搶劫團衆追擊斃之獲槍三支報縣仍發本團存用

利利舟連年常在北山一帶爲匪十四年冬忽率黨徒十餘拉去本團陳姓居民總團派丁掩捕擊斃追擒餘匪查問姓名多有在陝軍各部掛名者責令

具保釋之

十八年二月晚無賴搗味子等數人乘團總楊昌年新歿勾引外匪搶劫到賢鎮寓客樊氏團衆憤甚協議緝拿先偵獲內匪一名敘說同夥蒲寨巨匪十餘名總團函請其地協拿其村派人來告云匪聞事洩均遠颺村衆共議令匪等家屬賠償失主洋一千元獲匪另案辦理衆議允之乃將內匪三名解送縣府法辦

有匪號客工連年在外屢犯大案漏網未獲至二十年冬十月又在馬張寺劫人維新團首人聞訊率丁往捕格斃獲槍一枝報縣繳案

交涉

民國三年九月六日駐蒲城北洋陸軍何團過到賢鎮突入城勒索車輛牲畜與官人衝突開槍擊斃團丁一名拉去民衆九人總團報請縣知事派人往

返交涉數次無效果乃推代表晉省分呈軍巡各署奉批查辦並給死者卹金洋百元被拉去民丁亦得釋歸

五年三月二十二日陝軍第三旅常營自耀縣調往蒲城途中與維新團團丁發生誤會擊斃團民三名搜去快槍八枝繼以搶掠總團派皇甫光等數人往蒲交涉適其旅長陳樹藩過境羣衆遮訴陳悉其事發還所奪槍枝

七年五月駐蒲城興鎮之靖國軍第一路張部騎兵數十人經過時新西團惠店堡以索湯水爲名奪去守門團丁槍一枝總團親率團丁追獲馬匹衣物等件團人之從軍者出而調解各還原物敦修和好

六月靖國軍楊虎城高峻張鐸郭堅各部先後開拔假途西東事先以函來告過境期相約入境徐行無擾總團即爲通知沿路各村堡預備湯水隨地送迎焉

七年十一月高部逃兵二名經過時新東團聚賢村行劫團衆立執其人訊明來歷釋之而收存其槍彈八年二月高峻自白水派人持函來詢且索槍總團即令以原件付還

十六年四月石象儀部駐流曲與縣城駐軍劉營失和劉營官兵四名回家被石部兵士追擊來團請求保護總團使人雙方調解發給路條送回縣

十六年九月崇禮團盤獲槍彈一枝交總團封存十月党玉崑自鳳翔使人以函來索證明與之

十九年九月劉軍棄省城經富平東走陝軍之前被遣散者所在蜂起截擊初七日劉部軍官帶兵六名至到賢鎮西門店內聞大部在王寮鎮一帶被圍不敢前行來團請求保護並將槍械六枝交團保存留數日事定總團爲換衣服並贈路費五十餘元所留槍彈繳呈縣府仍得發團留用

民五事變始末

四團初建所恃爲防禦之具者刀矛土槍而已民國四年於省府領得快槍百餘枝配發各團人心稍壯而盜賊時復窺伺之民五討袁之役陝軍各部羣起響應三月郭部自耀縣赴美原所過繳收各鄉團槍無算有片兒者方爲匪與大狗等皆垂涎四團槍枝日謀篡取以自封植各與其徒布流言以聳衆是時胡景翼襲獲陝西將軍之子於富平縣城軍事方殷各部多徒手則更有以借用爲名來團脅取者各鄉之匪益無忌憚四月初八日晚志新團槍十三枝爲片兒所奪初九日時新團惠店槍八枝土槍七枝爲大狗劫去團衆皇皇不可終日時新志新維新三團各有鎗二十餘枝其團長皆以謹愿聞因匪恫喝則相率向總團交鎗泣不可仰或有以舉所有鎗枝帶至縣城暫投景翼營以圖保存之策進者昌年皆不爲動惟晝夜嚴防以備之以

本堡城垣未堅完不可恃移居維新團

西仁義坊

李堡閉門自守前後相持至數

十日陝軍第三旅旅長陳樹藩與昌年諭自蒲城赴三原過到賢鎮昌年迎謁以情告樹藩乃召各部諸人之在四團者至到賢鎮西門外戒諭之臨行時當衆申令毋得挾取四團鎗且令追還其所奪者衆始凜然稍稍散去陝局既定片兒大狗等仍爲匪團人以前事銜之議分途晒緝嘗一捕之於祥豐團再捕之於流曲鎮皆被跳脫至十月團人之商於三原者遇片兒星夜歸具以告總團派人帶丁赴原捕獲解回送縣正法大狗旋亦被美原駐軍劉營擊斃前所失鎗彈則由通匪諸人家屬賠償自是四團基礎始漸臻鞏固焉

社倉 賑飢

八年九月始籌建社倉歲每小歉則春借夏收大飢則賑貸知新團共籌集雜

糧一百石勸收義捐五十八石舉郭萬鍾爲倉正張九鎰張建張忠爲倉副

經理出入事宜志新團籌收雜糧四十餘石由王錫爵經理之王致祥王恆

照徐鳳岐等爲副時新西團惠店修禮村兩處籌收雜糧五十餘石以楊天福爲倉

正趙振武白寶善副之時新東團聚賢坡頭辛莊三處各籌糧二十石以王欽德蘇作

柱辛復海經理之皆以專備災荒無論何等科派事項不得挪用九年六月

維新團踵籌社倉共集麥糧六十餘石由李孟祺總其事李樹義徒立吉王

復金郭金有等副之

到賢鎮社倉連年催促迄未實行十二年六月夏麥豐收團總楊昌年躬自駐

鎮集衆勸告並派人協同保正挨門措收始得儲四十餘石以劉震雷毓英

等經管其事至十四年九月籌措崇禮團秋糧四十餘石舉羅同新等經管

存儲歲出入皆如前約

四團社會計歷六年始成先後各年中每遇青黃不接斟酌情形開倉放借或議加合或議作價各視所願主其事者按堡分散約期忙後歸還踵行不怠初議建倉集糧籌本計分兩項一爲按畝收本二升逐年息貸拔還先償小戶二爲好義樂捐所繳多寡任便將來不歸所收倉糧分寄公所及各大戶迨民九以後春貸秋收積漸盈餘每年按照原議退本早將畝徵陸續還清十七年夏大旱秋禾無收麥未播種團總楊昌年扶病會衆勸募四團義捐五百餘石各存本處倉儲又籌勸日新恆新德新三團各百餘石以備各團本處散放洎冬災象益甚縣府分區籌賑楊昌年又於四團以內勸募僑捐麥糧二百一十一石四斗銀洋百五十元與縣賑分會撥麥五十石零二斗區賑支會撥麥一百六十一石二斗洋百五十元至十八年乃將所籌賑麥與

第四區全區十九團

四團及崇禮團屬本團範圍不在內

發散子種由李孟祺趙宗樞經理作

爲社會之基本至僑捐賑糧則不爲四團分留顆粒

十七年冬派人調查團內孤寡乞食者每名酌給麥糧一二斗

十八年正月開社會散賑糧

向例小歉春借現值奇災衆議早發分四等造冊以爲別（甲）凡對團務能認真出力及巡防可靠而貧者給予麥糧

一斗（乙）凡平素醇良並無非爲而極貧者給予麥糧八升（丙）凡團中鰥寡孤獨老弱殘疾頗連無靠者給予麥糧八升（丁）凡煙賭敗家懶惰不營生業及不巡更上操時

常倩人代替者給予雜糧七升

是歲糧價每斗自四元漲至六元自正月散放至八月五團貧

餓者按口每月發散七升共散出麥雜各糧九百餘石八月時雨已落又分

散各團貧民麥種八十餘石

十八年九月秋禾豐登集議措收倉儲議決以所散之糧豁免二成其八成按

時作價減六分之一作價四元按照一成交納每麥一斗納糜子二斗共納

糜一百餘石

十九年春旱四月發散春借雜糧共八十餘石二十年麥秋又歉民飢者衆兼

值年關遂於十二月調查團內貧民計口發散約六十餘石

二十一年春夏久旱暴風黑霜連日迭降災象奇慘而倉儲連年散放今已告空團總楊豐年首先糴粟倡捐恤濟急民

二十二年春災荒延長團人紛往北山一帶就食而各處匪氛愈張每值操演巡防丁壯日形減少乃籌發丁壯特別糧按月酌發每丁食糧一斗以資全活且維團務

五月散糜穀種八月大雨雹大者如杵頭小者如胡桃禾黍根幹打折一空並籌散被雹災民麥種十餘石

二十三年六月措收倉糧荒旱連年倉儲久已告罄今幸夏麥豐收而民氣未轉集議斟酌措收約得八十餘石

善俗

民國二年本藍田呂氏鄉約法立會講經習禮聰俊子弟悉令就學貧寒者助以學費

每團舉講演員二三人或當地耆儒或學校教員於合操集衆時演說六德六行諸義及淑身治家睦鄰處世之方並勸革除侵凌兼併一切惡習屆時講演推行不輟

搜集團中孝子節婦爲國典未及褒揚者均爲立石道左以表之先後達二十餘人

七年冬十一月公葬烈婦郭陳氏先是知新團有郭青剛者任靖國軍胡部董營排長陣亡歸葬其妻陳氏臨穴身殉總司令部頒贈一門雙烈匾額給卹金三百元富平縣知事郭伯龍又捐俸三十元飭由本團公葬公祭建碑各界人士競贈輓誄頗極一時之盛

十一年知新團人楊蔭漳者生員楊柱之子死將葬其妻陽氏猝以身殉總團報縣轉報省府呈請大總統題贈摩笄心苦四字匾額本團爲文公奠樹碑焉

公約

四團初設原以防匪自衛一切章程條規具載楊健齋團練遺文錄茲不具述惟團防既久民情複雜意外之事隨時發生因事立法懲前毖後自治自衛相輔爲益其事類列如下

民國二年十一月二十三日晚有販運煙土之澄縣商人在到賢鎮城外爲時新團巡路團丁查出業非正當事合申斥第恐軼出範圍滋生流弊大非鄉人所宜因有私搜煙土之禁

到賢鎮爲東西大道所經西門外向有脚店行旅往來品類繁雜惟其地向屬

志新團稽查之責誼無諉卸乃令設立循環店簿由該團首人負責稽查禁收店捐違者議罰

滷泊灘在四團東南相距約二十餘里灘地斥鹵惟生苜蓿間逢天旱附近鄉民每多結夥前往搶斃恆有鬥毆情事四團懼其發生糾葛因於民國五年有制止團民越境搶斃苜蓿之公約

自軍興以來派款層出民衆苦之集衆荷田器耒耜之屬羣赴縣城籲懇豁免表示反抗謂之交農第今昔時異事殊愚民盲從妄動或生意外之虞而民五適值麥田歉收入夏又大旱他鄉發生交農之事四團愚氓或有加入者昌年乃與團衆約制止之二十餘年遵守不渝

六年夏始禁竊麥

軍興以來各鄉人民或有練習硬肚術妄謂可抵禦匪患民六以來此風愈熾

總團以此乃黠民乘機騙人斂財之術因有學習硬肚之禁

七年十二月先期禁婦女出境拜年是時匪警不息故有此禁嗣後每逢有事先期必申禁焉

九年秋八月禁餽節四圍聲譽既著寓客間有向總團餽贈禮節者昌年以為虛費無益婉辭却之遂並通諭各團主客各戶所有餽贈一概謝絕垂為永例

十年冬坡頭北溝等處先後發生潑婦當街與人口角幾釀事端總團以有礙

規約乃有禁制潑婦罵街之公約

十一年冬規定支差車價軍興以來差務紛繁有車之戶每勒索高價以居奇圍人苦之至是乃為規定車戶輪支公議發價不准勒索

十二年冬禁宰耕牛

十三年冬有假四團名義在外販鬻軍火者因有派人查緝之舉並與各團公

約懸為厲禁

十五年六月查禁假冒交農四團向不抵抗官款他鄉奸民或有忌嫉者本年忽發生假冒本團名義捏造傳單招搖聚衆之事遂申告嚴為查禁

近年流寓者衆人頗複雜或有自他部叛變暨與其主官有怨者亦潛來僦居

十七年春某部來函指責謂四團納叛人遂通諭各團清查遇有干礙四團名譽及因他故不能保全者均婉辭拒之並禁團人不得招容

十七年夏大旱秋禾無收糧價大漲各鄉時有集眾搶糧之風是時四團正進行勸募賑糧乃派人安慰災黎並嚴厲制止搶糧惡風犯者以匪論

十八年春禁高利貸

十九年正月禁挖苜蓿

苜蓿為荒年充飢食料是時春氣甫發萌芽初生一般飢民帶根挖絕不能復生故禁止之

二十年春禁止強贖麥田

向例鄉民當地均於麥秋收後歸贖世風不古當地者多於田禾成熟之際連同禾苗取贖爭執頗多故禁止之惟當時原帶

麥根出當者不在此限

二十一年春正月禁耍社虎

社虎為古鄉讎之遺世平年豐民衆多於歲首舉行去歲九一八日兵侵我濬陽不數月連佔東北四省國難嚴重且值

災荒人民嬉戲春節非古人遇災而懼之意故通諭禁止焉

二十二年冬禁挖菜根

年歲既轉鄉民猶狗故習集衆挖掘菜根以為食故申諭禁止以救民俗

禁煙

富平自民初禁煙時煙苗即絕跡軍興後煙禁漸弛他團紛紛播種四團以毒卉遺害最烈力禁本團民戶不使效尤

八月八日禁租地種煙本團既禁種煙人民間有向鄰團租地偷種者遂重申嚴禁

知新時新兩團與蒲城地境相錯糧地互有認種十六年八月蒲城興鎮駐軍令蒲民按糧種煙籌款並及團人之種有蒲糧地者總團以函往復交涉乃得免種

二十二年二月立戒煙會查造煙民花名清冊清查煙具禁售煙膏煙棒犯者議罰

禁賭

五年十二月以年關人情每多懈弛總團爲嚴防意外計通令各團加意巡查並禁年節一切賭錢惡習歲以爲常

十六年三月到賢鎮居民楊姓郭姓等聚衆窩賭違犯團規經總團查獲分別斥責使具永不再犯切結取保自新然後釋之

年來流寓既衆三五衣冠或以雀牌消遣商人效之浸漸成風總團作書勸告並布告民商不得犯禁違者議罰

鄉俗每遇廟會演戲輒有賭博四團以演戲最易招賭因與團人約禁止演戲過會四團十餘年演戲之事絕跡焉

公益

四團地當蒲富衝途每年夏秋雨潦大道泥濘行旅所經人畜艱苦九年以後總團遂令各團派丁修治東西大道以利行人歲以爲常

八年三月令各團植樹並舉專人董其事

知新維新兩團各植樹五百株時新團一千株志新團三百株桑樹一半雜樹一半

團務緊急之時凡勸農課工植樹息訟興學正俗諸事均無暇及十六年後始

議成立善後公所年支經費二百元由公項節餘或倉息項下支給無則由

上中戶分認

每團選舉精於農事者三五人為鄉老勸課農功

民國初年縣知事任子新按堡派差每堡派錢一千文近年差費繁重按堡科

派仍沿舊例而知新團村堡雖十餘自回劫後戶口流亡未復現存者僅百

餘家民貧差重苦累不堪總團屢具呈請至十一年春始蒙縣府核准按照

實在情形改降知新團等級併分五頭行差稍示公允

救災

九年冬十一月初七日晚九鐘地大震奇災慘狀多年未有總團派人分赴各

團勘查災情安慰人心並告以恐懼修省之義

十八年冬雨雪三尺積數月不融祁寒烈霜行旅斷途總團令沿路村堡平治道塗並勘查廟宿乞食之鰥寡隨時酌予衣食及柴芻之屬

二十一年四月暴風黑霜連日迭降麥禾全行枯死翌年八月大雨雹均爲多年未有之奇災總團派人勘查災情迭經呈縣轉請賑濟

維新團民王有懷死於五年陝軍陳旅常營之變家僅孤寡九年五月麥場不戒於火食糧性芻一時俱絕總團追念有懷死難之功爲文勸募義粟以賙卹之

息訟

息訟之法先就本管鄉牌或里老評理說和如無效再向本團團保或紳耆請求調解如事體複雜輻輳紛歧歷經多人不能解決者更向總團報告會同

紳耆原管竭誠商酌處息有非訟不了者聽其詣縣訴或縣牒查問則具以情覆焉

西城堡王姓一族相傳爲秦將軍王翦後裔向以糧地收與腴認種種惡習有糧而無地者亦有有地而無糧者數十年來訟案糾紛不決十三年經總團調處查清糧地着落釐正甲頭戶柱始獲了息

衛生

四團境內回劫以後浮厝之柩多年未葬總團通告各村堡查明有主者每年於清明節前後一律遷葬無主者由團隨時掩埋歷年催辦達二百餘具

二十一年夏霍亂盛行染之者吐瀉交作腹痛轉筋頃刻立斃各處傳染甚速總團依照避疫方法通告嚴防（一）勸人淡飲食慎起居講清潔並用石灰藥水鋪洒居室以殺病菌（二）印傳經驗藥方到處張貼（三）團總楊豐年

諸人捐購防疫藥品隨時施捨全活甚衆（四）染疫死者由鄰里幫助立即掩埋不許久淹

輯僑

五年春團防危急時本團婦孺至他鄉逃難者多被欺凌迨六年夏各處匪患大張美原附近尤烈鄉民相率南徙無可棲依白晝多在野外墳墓樹下憩息夜則潛歸無知團民出言報復總團聞之派人就所在安慰告誡團人不得欺侮客民並令所在村堡備湯水以給之

七年春靖國軍起三原各處匪氛益烈四方避難來寓者約百有餘家總團派人訪查慰問並嚴禁本團官人攤派公項勒取房租及凌侮侵抑情事

十五年夏嵩軍圍攻渭北各縣積六七月各處避難來者較歷年尤衆民舍不足容納總團屢使人到處視察撫慰安其居止並規定房租限度制止團人

乘機勒索不使有幸災樂禍之意

輸軍

民國七年冬三原靖國軍總司令部以蒲富各縣富商多避居四圍軍餉難集特派專員持檄來索特別客捐萬金總團奉命勸諭多方籌措數千金以應之

八年靖國軍楊虎城部駐櫟陽鄧寶珊部駐三原蔣朗亭部駐富平均先後來函謂四圍歷年完整又多寓居富人請籌措特別糧秣接濟軍食總團集議覆函許之次第籌措各輸送數十石

十五年冬涇原之圍甫解省城以外戰事猶亟于右任自俄回陝就國民軍二三聯軍總司令職於三原殘破之餘軍食無出乃派人持函來云「戰爭危急存亡爭此一問請籌軍糧以濟急用」內有「強敵未殲大軍雲集弟自西

北轉折四萬里赤手歸來心有餘而事難濟貴處如能以民衆自動辦法籌糧千餘石以飽飢軍是吾陝曾經糜爛即以貴處完善一區救吾陝數百萬被難人民並救援陝十數萬義軍也」等語即日多方籌措先輸五十餘石仍陸續籌措以應之

十九年九月陝軍各部之追擊劉軍者至富平時本縣人崔俊峯駐縣總團務閉門不納各部遂分屯城外城內乏食使人來團告飢遂多方羅掘籌糧三十餘石夤夜潛輸以濟之

弭爭

七年夏間第三區薛家鎮一帶硬團奪郭堅部游兵槍馬總團使人調解不聽八月郭堅自羌白突圍出駐美原索前所奪物又不予遂派隊剿之禍連數十里焚掠烟霧障天昌年馳函稱八團禍由自招被懲亦重今宜息止郭得

書即撤兵

靖國軍隊長田玉潔駐涇陽其弟玉鋒爲連長追變兵至本縣底店爲當地硬團所戕玉潔怒開兵一營欲往剿之方抵縣城昌年致田書謂鄉民無識事出誤會宜且從寬田閱書竟即撤兵

八年二月省軍劉旅徐團與靖國軍岳部鄧營戰於施家鎮河止頭一帶相持月餘俱有倦意乃使人以函來告總團使李孟祺楊豐年郭萬鍾諸人分赴雙方調解旋撤兵各回原防

申枉

八年夏時新團保正楊坤德在流曲上會被美原東北李某拉去總團去函索之遂得釋歸並覆函道歉同時有蒲城韓某亦被拉去月餘始得踪息亦去函索釋此後四團人出外遇匪詢明住址即不再拉並加保護焉

十七年秋九月志新團居民王宗元因與陝軍党玉崑之妻張彩霞有葭葶誼彩霞常寓其家党部既敗家產被抄張誣王宗元家寄存鉅金逮縣押追幾致不白總團於省委來團搜查時爲之多方證明轉陳省府遂得昭雪

恤鄰

十五年八月縣城被圍時聚賢村少冬娃隨營掠取寶村堡牲畜衣物等件私運回家總團聞之派人查封贓物函達寶村紳首轉告失主來團認明悉以原物還之所餘無主零星小物變得價洋二十三元並交寶村官人作爲賑貧卹寡之用

是年又有修禮村民張春善其子淫狼於三原隨營擄得粉李村大車壹輛牛一頭春善拉至其家事經總團查出將車牛變價五十六元送交三原粉李村官人賑散災民

十五年省城被圍八閱月十月十五日城門始開昌年倡捐粟三十餘石並勸團內富人捐粟輸送(共六十餘石)以賑圍城中久餓災黎並徧問鄉人之乏食者餽粟焉

褒獎

民國三年十月富平縣知事龐宗吉來團驗操頒給獎章一座

五年十月陝西督軍頒給獎章一座

十二年四月陝西省長頒給儀型鄉里匾額一方

十七年八月陝西省政府頒給銀質獎章一座

十八年六月省政府以四團緝匪衛民有功地方頒發團總楊豐年副團總

李孟祺王錫爵團長劉震等銀質紀功獎章各一座

二十三年六月陝西省民政廳長頒贈保衛型儀匾額一方

跋云楊健齋先生富平傑特士也少貧習

吏以才思敏給見賞於新撫陶勤肅公遂佐軍幕有年晚歲鄉居值辛亥改革地方多故創立民團聯合自保爲鄉者四卽所謂東四團也其團丁無常置有事則民之健者皆爲丁故費尠而贍負輕清戶籍繕堡壘嚴巡防故內匪絕跡而外警有備余忝膺民政以本年春巡視至其地觀其遺法與其民情風俗及禁煙積穀息訟諸端皆與他鄉殊異始知先生雖歿而精神常存口碑所傳信非虛也用特製贈匾額榜諸詞字將以誌嚮慕資矜式聞風興起是所望於來者

六年陝西督軍兼省長陳樹藩以四團頗著成績是時各縣仍有游匪出沒乃任命團總楊昌年爲富平全縣保衛團總局局長昌年屢辭不獲姑先就第四區保衛團分局局長數月旋以病告退

十二年三月陝軍第一師師長胡景翼將率部東出顧念地方以四團團總楊昌年績譽久著使人以狀來任富平同官耀縣三縣民團昌年以老病婉辭

二十年冬十月爲已故團總楊昌年建專祠十八年四月十六日葬團總楊昌年四圍民衆執紼來會者千餘人無不泣下及葬

邱甫成天忽大雨農民遂得及時播穀自翌年二月三日落成行迎主入祠禮並議十七年春至此始得犁雨人咸稱異焉

決以皇甫光郭萬鍾張九錫附祀三人皆多年有功團務者

二十三年二月三日公祭楊祠並議決以楊震王瀚王錫爵祔祀團總楊豐年
並捐基金洋二百元由各團輪流值年經理祠事

卷之六十一 百五十五 由前...

一千三百二十八日...

健齋辦團文錄卷一

富平楊昌年紀五

治團概論 上

物必有本木之本在根水之本在源鄉團之本何在乎或謂在法如章程之類夫法制乃文爲之具耳雖不可無抑亦末也法雖具立不能自行况乎其有不具者乎推原法所由立與其所以行則必有其本矣爲述團本十二章

一曰道

道者事物當然之理修己治人循其當然之理莫不各有當盡之責也然必己先立而後可以率人已先正而後可以服人已先無一時一事之不揆於理而後可以長人如是焉而無違則近道矣能近道而後可言團矣天下者一鄉之

積一鄉者萬家之聚地雖小與廣土無異形也人雖寡與衆民無異情也故必有體國之精神而後規模立有治家之真純而後守望行有天地之量父母之心而後能容能保分之所在理之所在即道之所在分有所不當盡者力有所不能爲者無論已若其力所能爲分所宜盡則必以勉諸己有一日之任必思盡一日之責不能盡其責則寧委其任憂勤惕勵不敢忘非急功也所以盡吾道而已得失毀譽不敢計非貪名也期以順吾道而已悖謬頗僻不敢作非矯飾也懼其失吾道而已有一毫偏曲驕恣則一人離有一事怠惰輕忽則一事失非盡道矣何以體此道智仁勇三達德是也何以敘此道君臣父子夫婦昆弟朋友五達道是也何以行此道敬事而信節用而愛人使民以時是也興教化則本於鄉三物修守備則惟合兵與農蓋其原在一誠其終始在主一敬以此肫勵小心翼翼職思其憂不懈於位擴而充之拳服力行以求止於至善則

庶乎能盡道矣能盡其道乃可與言畏天能知畏天始可與言保民此謂爲團之要也

二曰天

天者民物之大父母道之所從出也天生民而命司牧以爲民即一鄉一邑之士凡有民事之責者何莫非天職天工自乾坤滄桑億兆塗炭揆諸天地父母之心豈能忽然置之當斯世而有能拯濟斯民保安制治者天必順之無小大之殊也天何以見見諸理而已福善禍淫厥類惟彰禍亂之興雖曰氣數抑豈不以迷謬之民淫縱其欲累孽致之哉然天心至仁改則宥之矣人能以寅畏之心嚴於治己兢兢業業常存對越不敢有一事違悖失道以拂天心則天鑒格又能本治己之心以謹率民教誡警飭不使有一夫橫行越志以重天怒則天譴回二者交脩積久誠孚貫澈幽顯而後可以天順人應否則天心雖慈不

私於有罪之士區區智力如天理何若其人雖有保民之心而無律己之業雖懷自謹之志而鮮善俗之功雖擅攘外之能而難免內藏之垢者其失有淺深其謫有輕重其究亦必敗耳是故得天難然天又不可以常情恃也懷乎嚴哉十事之九克協其一有失敗即隨之譬若行道不躓於山不履於淵自投於陷阱天豈能以手挈持之哉故凡自任以保民之責者必其盡己盡人充乎父母如臨之心而誠求之始可以感天必能格天心回天怒始可以挽天運保斯民非漫言也非襲取也亦惟曰以寅畏之心脩當盡之道積之久誠之孚順之至而後獲其應焉是故詩曰畏天之威於時保之而易之大有亦必至上九之非亢非悔無不利而始言自天佑也微乎微哉

三曰地

所謂地者形勢耳形勢之爲用惟在扼險以固其夷險也者隨處可設非必山

谿隘塞也凡形之高下可藩蔽勢之出入當要衝我用制敵敵用忌我皆所爲
險或葺其城或增其卡可墩者墩可塹者塹皆設爲險及其成也星羅棋布形
勢相接疏密相得首尾相應要使我馭其中處處可以互援賊入其中頭頭可
以被擊則人望而卻步不敢來犯是謂制勝於無形嗟夫險固不可以自恃而
亦不可授人地雖予人以險而亦視乎人用之何如耳易曰王公設險以守國
豈於守鄉獨不然哉自世亂匪熾莫之爲保蚩蚩者氓孱如羣殺雖有險而不
知備或獨備而弗能守聞警無主烏獸闐靡至使其所築之城反貽賊以利用
盤踞搏噬俯首帖耳蓋因平時漫不作防臨事無從措手雖有所設不如無也
是謂自棄其險地何負於人乎而徒傷悼天災之莫救匪禍之不堪世亂之至
亟嗚呼生乎今日忘乎所主不圖自振而望誰爲之拯也有地不守罪坐無人
有人不任咎在無法徒法不治徒令不行衆志不齊衆心不固無材以主之地

險亦何常之有也

四曰人

人也者盡人事以回天也人事脩而後天意回然必先之以選人才得人和固人心而後所謂人事乃能盡其修焉夫大廈非一木所支十室之邑必有忠信輔弼者心膂之司也團保者方面之寄也脾長村約者爪牙庶務之任也其選皆不可不慎悉心延訪尊賢使能布列庶位人之道然也地雖偏鄙若野無遺賢才盡登用固猶不難也凡有微長皆假以事斯可勸功而教不能其用之也寧使德優於才不可才勝於德世人多喜小才不知誠篤者雖或短於治事而其事仍在猶可繼理若夫寡德之人自用私智雖或偶有所濟終至僨事不可救藥故雖僥倖有功宜厚酬而遠之不可久近近則驕縱妄爲將不可制古人已驗之跡歷載史冊引爲深戒則用才無失矣開創之初人情未洽凡有措施

周咨博訪謀必稽乎衆策事必求諸至善誠一公溥以通衆志以和人情然最難馭者豪強最難處者狡富最不易曉者愚蒙豪強多陰小羈縻勿絕團成而使彼亦預其名則忌嫉可泯狡富多慳吝委曲調伏勿遽爲摧折則嫌憾可少愚蒙見卑識淺多懷疑懼開導話言纏綿懇摯則誠意可格而人情無不洽矣固心之道惟在實績民心之渙散由於無人爲主也眞誠懷保水火救急若慈母之保其子艱險不渝則人心自固矣然必爲之設施措畫慮出萬全使其心有所恃而已然之迹又甚顯著則雖麾之亦不肯去矣三者旣備人事乃可得而盡焉人事之盡修省爲要戒謹爲基持己不敢不敬也與人不忠不忠也處物不敢不仁也慮謀不敢不臧也周防保衛不敢不切也撫治教詔不敢不至也所急正者民風不使有一人悖爲非道以亂天紀所應慎者民訟不使有一夫抱屈含冤以鬱天和孜孜翼翼夙夜勤惕不獨一己不敢暇逸而尤必使羣

心咸知戒懼不獨一己不敢縱肆而尤必使民德無陷頗僻皆修省之事也有所當爲力無不盡有所未善不敢不勉所慮雖勞所慮常密身雖止乎堂室之中心常周乎四境之外謹小慎微防機杜漸凡事之自外至者苟應考慮必早爲警飭不使有一隅或失以負吾民即團內細故但涉招釁啓弊之由必急爲糾正不使其潛滋暗長以至難遏皆戒謹之實矣修厥德以感天心盡厥道以幹世運上下祇肅戒懼天變此團成之本事之至要者也世未有荒逸縱肆而能逃天譴者從古德盛遇隆之聖賢猶不敢忘其戒懼丹書有敬勝欲勝之文商書有天孽人孽之辨而文王之詩有曰永言配命自求多福夫不修德配命而欲求多福不盡人事而欲以區區小智勝天運者亦惑而已矣

五曰體

爲治便須識體豈獨於國爲然鄉團之興雖自唐宋然實周官寓兵之遺法特

後世行者趨其末而棄其本又不講習於平日故恆無補於時徒多紛擾反戕
民命良可慨矣考周官鄉里之制本合兵農師役禮樂政刑爲一途居則爲比
閭族黨戰則爲伍兩卒旅即民即兵且治且教其爲民也本業是務無陷非僻
其爲兵也農隙講肄有勇知方其統馭也職權得操服習有素平居鄉里教養
最渥一旦從征有勇知方無生邪惡事竣歸耕兵無坐食之糜將無私兵之嫌
居則同和守則同協戰則同仇奸慝寇盜無自而作雖至春秋戰國之世猶不
聞有悍兵倡亂劇盜亡國之憂蓋制度使然也夫寓兵之制所以安民不獨爲
救亡之作而國基卒以永固者蓋所經畫得其本也後世不留意於鄉制及遇
危難乃倡鄉團驅不教之氓爲倉卒之舉徒取敗亡或滋他慮無本故也論者
不究其用之失道而反謂其團不可用豈眞然哉當今之世外有敵國內鮮樂
郊豺狼載塗焚溺徧野而欲濟遺民以度浩劫舍鄉團更有何圖顧欲輯鄉團

必起鄉治起鄉治必效古人舉兵農治教而一之師其意不拘其跡斟酌其可行於今者以治以教且耕且守挽天運濟人窮出水火登衽席雖極之將來際之遠邇或有增修當無廢損安危休戚惟視治理可以知體之重矣體既明則職自有所宜盡而乃有以爲難者是不知團之爲道必探其本舍本圖末必不能成且鄉團與自治皆屢奉明文舉辦無可疑者畏難苟簡夫何能濟特其於鄉里之間以鄉人而治鄉事處草野而任重責有非詳慎謀慮不能善其道者故易益初九之爻辭利用爲大作必戒之以元吉而後无咎夫子於繫辭傳三陳九卦亦必終之於巽以行權而後爲盡是則所當拳服而弗失者與

六曰德

仁義禮智根乎性生者德之本也行道而有得於心者德之蘊也發於外而喜怒哀樂無不中節者德之和也德之所該雖廣而其爲要不過義理性情二途

義理不可差忒性情亦忌乖戾每見人有發言議事立意未嘗不善而聲色暴厲使人反生愠恚雖當從而不從故凡喜怒哀樂之偏皆足致病而怒爲最若不涵養以變化之雖有多才亦難爲濟况無才乎且怒甚則忿忿不顧理必更致患程子所言於怒時遽忘其怒而察理之是非恐或不易惟孔子忿思難之言於吾人最爲警切思難則懼懼則其忿自懲而有可改之機姑置其事退一步想緩一時作則心平理得矣又人之性情或失之剛或失之柔或失之卞急或失之迂緩或爲苛細或傷簡畧皆足爲德之累雖若在喜怒哀樂之外究不離四者之中皆當於平日極意操持戒懼慎獨存養省克以致其功使皆中節而無過失則義理與性情交正自然立德有本推而廣求聖賢之訓以爲進修之師如易之乾健坤厚損過益善書之德惟一敬作所義制事禮制心毋輕民事毋忿疾于頑孔子之道國五事

敬事而信節用愛人使民以時

爲仁五目

恭寬信敏惠

告子張之五美四

惡告樊遲之崇德修慝辨惑孟子之辨義利明教養不忍人之心與政博采而奉持之則裕德有道而其用益宏矣然其施於政也有寬有嚴有威有惠溫肅並寓皆本柔剛剛以立事柔以治情溫以體仁肅以正義威則用於禁暴惠則施於使人撫民在寬治兵尙嚴施之各有其道用之貴適其宜當寬而寬當嚴而嚴固不可拘於一徧尤必當協於其度剛柔變化威惠並行而皆以敬謹出之禮義行之則其所以爲用者無失本乎四德發乎七情制爲百事罔或失道治已治人其在斯乎反是不思而能致治乎人者鮮矣是故君子先慎乎德

七曰政

政者何職分所當治之務也職分所存即政之所在其事雖繁總其綱不外農

兵治教四者條其目則各有所屬農之目五田土

疆界實

勸課

樹藝植

補助

贍貸

巡

護稼穡徭役

賦斂

兵之目十編隸教練製械修築巡徼防禦偵諜擊捕稽查賞罰

治之目十有三秩祀

祈報祭
零之類

清戶用人理財興革禁約譏察聽斷交際儲峙賑

恤市肆課績教之目八學校鄉約宣講明倫正俗興禮諫救彰瘡都三十有六
統其屬以治下率其屬以事上而受成於官府蓋鄉職也雖不能驟然盡舉要
當以漸而圖然爲政在人徒法奚補故孟子言先王之道必推本於不忍人之
心孔子論九經達道之所以行亦必歸結於一誠世有爲其事而初無其心矣
未有無其心而能爲其事者苟無其心則休戚痛癢無關泄沓成習民將何恃
故朱子有言一日不得其職則不敢一日立乎其位一日立乎其位則不敢一
日不盡其職誠能以不忍人之真心行其所當盡之職事視之如家理之如國
於凡兵農治教之謨條舉而漸圖之兢業憂勤不容自己則政成於內效孚於
外世宇雖亂猶可冀一隅之獨安天運將復或有助於全國之治理其庶幾無
負斯團矣乎

八曰教

教也者治之本也教化急於民教練急於兵孔子言庶言富必繼之以教孟子論殃民用戰即深咎其不教蓋治民者莫不以教爲急教及於農尙須教及於兵教之以文亦必教之以武鄉團之教蓋必兼此二者而後乃全其教民也教之於庠序以育俊彥教之以宣講以化鄉愚教之以倫理使篤天顯民彝之重教之以敬讓使有羣居和壹之風教之以禮祭威容所以化其囂陵鄙倍之志教之以忠信淳良所以遠於非僻刑戮之誅其他隨時告詔因事啓迪策遣使命指示周詳訴訟剖決推陳天理莫不開迷謬於事理之中寓教化於刑賞之內一言一動舉皆可法農夫牧豎靡不觀感則無往而非教矣其教兵也教之以編次使知部伍有定教之以體統使知名分難越教之於常日使爛坐作進退之式教之於合肆使窺分合變化之方教之於巡行使測出入隱現之妙教

之以技藝使有手足武敏之能其他習號令以旗鼓開智慮以講劘作志氣以激勸蓋亦莫不隨事爲教因教成法示以塗轍揭其蘊奧使皆明其意而不昧其理雖倉卒遇變亦皆自有應之之方則庶乎可用矣夫鄉團之兵即齊民而教之也教之以文欲其識禮義而知方教之以武欲其練才藝而有勇才藝之練也易心膽之練也難練於營伍之內可以簡擇者猶易練於鄉里之間限地取材者殊難心志猶可以恩義固結膽氣則非淬於實事俾其與識俱長不能爲功先以小事指示機括使其步步得效則膽張漸以大事授之方畧使其處處克捷則益壯然鄉團精神必歷三變當其始也猥懦苟安病在委靡則宜多方以振之及其繼也武勇有功病在囂陵則宜明禮義以柔之乃得爲用迨其久也安肆怠生則其病又在懈弛懈弛之病最爲難醫惟有惕勵精心時加警策使其不懈乃可與之持久此其情也三變不勸而終貞之以文德則庶乎可

以成教矣

九曰紀

紀綱者爲治之要領施於政事則曰紀綱施於兵事則曰紀律其實一也夫欲圖治於世亂風靡之日以掇禍敗之極必先究其弊之所由起而後可以振而理之故漢祖繼秦以寬而葛相治蜀以嚴晚近之世鄉制蕩然民若散沙病在縱恣亦在委靡素無紀統曾不知長上爲何物撓抗陵蔑以炫己能而爲之長者亦遂無如之何及其見於事也苟且之意恆多奮勵之情絕少凡涉公務雖所當爲而亦浮誕泄沓不肯實做此其勢已召致衰弱而又虛僞譎詐弁髦禮義邪說橫流凶悖縱肆寢成禍敗莫可救藥若不飭政勵兵何由拯亂飭政事必立綱紀勵兵事必嚴紀律綱不振律不脩雖有制教吾將誰施畧申言之自總團以下逮於散團作其綱者大則團長保正小則牌長鄉約以及散雜各目

皆監以團紳公事自上而下者層層節制必聽約束民事由下而上者亦層層董理必經團保團保不決然後達於上小事自決大事集議令必期其實行事毋許其私擅干瀆犯上者雖親無寬貪黷暴下者雖細必究訟不能息必送於官不許在鄉私鬧爭幸得解事屬當然不許調人受餽此民事之紀也操練巡防者定依程式檄傳徵召者限以時刻敬奮怠惰各有勸懲下人廢事其上連坐在上失律下不與咎城門闌入罪在守者夤夜受盜必責更夫兼咎牌約必使破獲而後免焉至若臨敵尤昭肅毅進退行止必依號令勇者不得獨先怯者不得獨後棄將逃遁者立斬背陣亂行者不赦圍城作宄定予誅滅乘亂擄民必加極懲要使行衆所至一財一物不得私取於人而尤必嚴事外之防巡行在路不准私搜煙物因事下鄉不得藉詰槍火志在貪婪則無意於殲敵法徧親疎乃能防其作弊此兵事之紀也紀綱不振不可以爲團紀律不申不能

以馭衆振之於民則法度肅而事有敘飭之於兵則紀律嚴而軍無敗畧舉大端已見梗概且紀綱必先振於平日而後可行於臨敵法令能行於全民而後可率以制匪此不易之理而亦團治之首務也慢而不治弛而不張煦煦响响令不行召不至金鼓不能爲進退雖武侯復生亦未如之何矣

十曰備

不備不虞不可以國團豈有異乎書曰必有備有備無患易曰除戎器戒不虞蓋禍患之來多因無備能備不虞則患雖至亦不能爲害故兵者畏道也忘戒則危將驕而輕敵者必敗戰勝而無備者常覆大亂之世環而伺者不知凡幾彼日日窺我我刻刻須防彼頭頭可到我處處宜備謀宜周到事宜豫立備於器械者宜良備於儲積者宜充作戰之備宜長守防之備宜固未然之備常如臨敵已事之備勢若反攻不特備匪兼且備其疑似者匪猶可制疑似難測偵

探必明候視必謹凡近我境者之一動一靜我必先察過我境者我必先戒彼雖無他我自當謹設若衆寡懸殊中情叵測更須嚴作厚備或出別策以伐其謀使之不得逞而後已所謂有備無患者此也至若不虞之防尤爲重要歲時令節人所易忽風雨寒宵人所易惰農田耕穫各勤本業故盜賊往往乘之此則全恃主事者之周防調遣提控稽巡謹而又謹庶乎可以無虞昔人有賊所不至亦必嚴爲之防軍在閒暇而常披甲以坐者何謹如之居今之時四面可虞而衆人蚩蚩蔽上偷惰稍一不慎禍敗隨之爲之上者安得不憂勤惕勵冰淵警飭以求免意外之患哉

十一曰兵

鄉團之治合兵農政教而一之者也故其衆即鄉兵也其率之者即鄉將也總一鄉之衆任一鄉之將入長出帥繫一鄉休戚於一身烏可以不知兵兵者險

事也任得其人則一鄉安非其人則一鄉危烏可以不知兵者當之必其德性才猷遠過他人文能附衆武可威敵其次則公廉正直勤敏勇敢畧知兵事者亦可倚畀下此則常人矣烏足以當之哉夫兵家之要在於知彼知己識時審勢有節制能方略臨事戒懼動必以義謀定後動不行所疑以靜制動避實擊虛制人而不制於人慎進而不輕逐利先爲不可勝以待人之可勝皆鄉兵之所宜講也且志曰諸侯之兵自戰其地者謂之散地又曰知吾卒之可以擊不知敵之不可擊勝者半知敵之可擊而不知吾卒之不可擊亦勝者半良民之情多柔而寡奮各處其鄉常散少聚無餉糈之養有室家之戀常苦不齊謂強弱又患不專謂志力賊匪則剽掠輕疾專務掩襲恆聚而易來時出而難測彼損十人不足憂我亡一卒則衆懼故守則我長戰則我絀惟能憑城郭扼險要使賊不得入可以挫之卡堡星羅聲勢相接使其入則受創可以懲之出境而戰馳

逐遠野偶然可矣故鄉團之道以善守爲上掩擊次之戰則不得已耳

不能一戰滅之

則反成後憂故須慎戰若其力能掃穴犂庭則不以此爲限矣此勝負之數也今世之團制有三一坐團一行團一

爲行坐合一之團坐團費省而可久然無常聚之卒故多利守行團募有專丁故利馳逐然籌養難久坐團處處有守雖傳集遲鈍而備禦易周行團地廣力單雖發縱疾速而多慮失顧欲求戰守兼資持久不敝惟行坐合一之團可以兼之然欲其能勝人則又在平日施行政事有大服乎人心制馭兵謀有以潛消其邪志處理事故有以極盡乎情理之宜而不少貽瑕隙孚德讐威自不與我生心而收其效於戰攻之外吾固不欲吾民以肝腦與狂賊相拚而賊亦自不敢輕犯其所獲者大矣故軍志曰善用兵者全國爲上破國次之全軍爲上破軍次之所謂善戰無赫赫之功也今世之用人者多不慎其選膺是責者又每以浪戰爲事募數十卒製數十械內治不修根本不固徒與狂寇相角逐

未能制匪每爲匪破自救不遑安問其他且以鄉人治鄉事固多後慮剛柔皆難智者深避而不爲愚者雖爲而罔濟自非極慎其選善變以通何由得致其成故愚嘗有團法三等之說其最上者則爲省垣置局設大總道縣設分總各鄉設散總簡外土之賢者來主其事而以本地之賢良輔之如不得已或以彼鄉之良來主此鄉決毋自主其鄉授祿畀權責其成效庶可致鄉團之實績矣

十二曰交

交者所以睦四鄰協四方也鄉團雖小不能閉關時當擾攘地處衝途公私相關日有事事四鄰不睦不能以親邇四方不通不可以行遠故欲安民保境交亦不可忽焉夫歲時通問政事關涉四鄰所必有也軍府徵求賓旅過往亦四方所不能無也四鄰之交溫恭信讓而無欺不待幣帛饗殮而情誼可摯四方之交和遜委婉以周旋必因事乃與及焉交道修則化有事爲無事然兩境之

間民事不慎則鄰壤之瑕隙易生史册所載列邦邊界之事每因小故而致大釁即中國之與外夷亦多有焉邊方之事謾上叢怨者多矣以彼鑒此能不懼與故鄉團首領凡遇兩界人民有雀鼠牙角之事最宜虛心體察務得其實持平以處其有不能以理遣者戒飭我民寧讓毋爭則所全者實大若民各聳其詞而長上又各庇其私則相激而事起不獨無以息爭且將報復無已果何利焉至與戎伍交涉勢分全殊我固不能強爲爭勝然亦必處之有道剛柔相濟不亢不卑方能彼此相得情誼常合鄉團之道其必以是終乎

右述團本十有二章乃概論其理耳至於所操有廣狹歷事有多寡收效有淺深則又視乎其人與其地已

治團概論

下

謨明弼諧見於虞書訏謨定命徵諸周雅孔子於行軍之道亦曰臨事

而懼好謀而成事未有不謀定而能濟者况以鄉團之小處此世變之時謀不萬全猶難有濟敢不先謀乎爲述團謨十二畧

一曰正其本而未自舉

本謂身也事之機括在己而已矣己不慢而民自敬己不妄而民自信己有恩而民自近己用誠而民自格忠信可以孚民禮義可以馭暴無總貨寶則民自輕於財利能持正節則民自遠於邪途源潔則流清表端則影正未有己不立而能率人者故君子求諸己小人求諸人孟子曰愛人不親反其仁治人不治反其智禮人不答反其敬行有不得皆反求己董子曰上之化下猶金在冶惟鑄者所爲猶泥在搏惟陶者所爲烏有柄職行正而民不翕然化者故君子之德風小人之德草然且從好不從令從實不從名身教者從言教者訟故君子有諸己而後求諸人無諸己而後非諸人所藏乎身不恕未有能喻諸人者苟

能實德裕於身衆善備乎已大本已立大綱克舉令必行教必立治具畢張本之以誠持之以敬誠敬自矢精勤不懈自能日起有功此之謂正其本而末自舉

二曰持其要則事不煩

凡事必有其源得其源即得要矣倫紀者治教之源也天顯不彰民彝泯墜父子兄弟乖戾參商骨肉姻戚角財競訟悖逆爭鬥之習成浸流爲匪者多矣教孝教弟培扶勸懲於小於微則頑嚚桀逆之風可潛消矣禮義者風俗之源也禮義不明善惡莫辨侵凌欺詐攘奪殘削放僻邪侈之事作寢無紀極教禮教讓激揚繩糾明示好惡俾曉然於邪正是非之有辨榮恥刑戮之有歸則梟惡狙詐之習可默化矣荒嬉者廢墜之源也本業不力外誘是好聲歌狗馬喧戲浪遊凡屬無益之事一概設法禁止木無附枝則軀幹直上心不外放則本業

自敦父子兄弟各勤生計則縱欲之心自寡矣奢侈者窮困之源也因極思濫而能不爲非者鮮矣禁越分之侈靡絕無謂之斂釀公私有節營爲有制飢寒緩急有恃無恐則走險之志不萌矣至若煙賭惡習爲害最烈種煙足以招匪禍而得癮隨之務賭足以破身家而爲匪亦在其內禁煙則禁種禁賣禁吸務絕根株禁賭則禁窩禁犯禁具雖婦孺亦所不許二害旣除則劫奪蕩敗之源絕即一切惡事因緣亦從此消滅於無形矣他如治容誨淫私鬥結怨左道誤人演劇聚衆以及父在析產夫死招夫質地贖禾作媒抽肥諸如此類不勝枚舉皆爲末世之澆風禍亂所由起能一一釐而正之則民俗返醇事故漸寡初或憚其爲難後必知其甚易乍或視爲紛繁久則覺其至簡所治在此所效在彼此不獨於制匪爲正本澄源即其他之糾紛亦可盡息而無不理以視枝葉披尋終無成效者不其遠哉此之謂持其要則事不煩

三曰思攘外必先安內

大亂之世匪寇蓬生何地蔑有豈獨境外即本土之內桀梟而喜亂者有之惡貧而走險者有之歆於利而動其欲者尤有之或已成而未著或顯聚而勾通浸淫支蔓荆榛滿田良苗困矣盜憎主人利在不治一旦有人起而整釐地方團結保衛彼所深疾隱忌必且摧敗搖落務傾覆之俾不得爲政而後快是內匪之爲患尤烈於外匪也苟不詳先後之序忽於內而急其外則同惡相濟內外勾連勢所必至外匪未禦而內患先作未有不傾覆者且外匪之來每藉內匪爲窩藏外匪入却恆倚內匪爲引導內不靖則外寇亦無由制矣審厥渠魁殲其一二赦彼黨羽俾各自新禁來往使不得交通收器械使無可爲害彼失所援自不來犯即其來也制之亦易積之至久內匪革心外匪絕望將不待戈馬馳逐自能閭閻不驚矣否則肘腋藏奸夫何外寇之能攘然安內之道固非

專以剪鋤爲事也必先脩政治勸懲使民氣返醇汚俗頓改向之從匪者於一二渠魁被殲之後均能悔悟改行向之不爲匪者更不至復流爲匪文治脩明武烈昭著熙然而安秩然而理一朝有事於外率我素教之民撻彼凶殘之醜或戰或守內顧無憂滅此朝食不難爲功此所以欲求攘外必先安內也

四曰能治良始可禦匪

賊有衆寡禦有難易畸零之匪什伍成羣多或止於數十制之不難也最可患者每遇軍興必有嘯聚之徒螞然四起千百爲徒趨赴投軍剽掠城堡無惡不作此則非大合團勢不能抵禦顧鄉里之民素無統紀雖已成團仍不知團爲何事或徇私而怠公或傲上而徒黨令之不行召之不至雖有金鼓不能進退妄造語言聞警自擾勇者登先黠者遁後勝不慮伏敗不相顧一人失陷大衆披靡是烏合之徒祇貽人擒耳如何可使故欲制匪者必先從事於治良作其

節度振其紀綱詳其告詔練其勇藝使卒識士意士曉將情分合進退惟令是從信著如山令齊如火始於小節課以程式漸從大事使之閱歷服習有素節制有方夫然後率以制匪可衆可寡乃能爲之用矣然鄉團以守爲主將欲期其節節制勝必先使其處處有守彼能自守而後可以待我之救我能用救而後可以應彼之急以守爲本以救爲先戰乃不得已耳及其久也相習成熟聞警不呼自至緩急因應得中無憂乎守亦無憂乎戰隨匪勢衆寡而用之無不得矣苟以不教之民復無運用之方輕於一擲爲禍必深是則團之罪人已故其先也能治良民使不爲惡則良不化匪多一良民即少一匪類而良民之氣勢漸盛及其既也能教良民俾有節制則委靡可振武勇堪作戰守有恃而匪徒之膽益寒此又內外彼此消長一定之機不待交鋒已決勝負此所以欲求制匪必自治良始也

五曰審居重然後可以馭輕

善握兵者必先自固其本根本不固不可以安身况制敵乎故總理數團者必自兼理一團居數總之上而任區團者必自兼理一總合數區爲一縣必自兼理一區所自兼理之地域又必使其丁壯器械盛於他域夫然後可以固根本而持枝葉指使有衆呼應靈捷唐制府兵隸關內者居天下三分之一近世湘軍爲營官者必有親兵爲統將者必有坐營其意蓋曉然矣奈何今時治兵者率不以此爲意而今之縮團者亦忽於此總理衆團曾無一團在手惟以空拳指揮一有緩急徒恃隨身少數之人往來奔命烏能久而不困哉遇有屬團告急我力不給乃呼召於別團一旦失時彼望救者以我爲不足恃則後之號令將不肯聽而團事敗矣况弊又有甚於此者乎雖以甚有德惠者處之亦難運用此所以居重方可以馭輕也

六曰善擊虛則無俟乎血刃

兵有實用亦有虛用者惟視其勢耳堂堂之鼓正正之旗原埜相當白刃相薄用於實也時當其可不得不然若夫避實擊虛擣瑕批隙則兵家之妙用而辦團者尤不可以不知擊虛之道無處不有在善用之而已賊盛至時不擊擊其惰歸惰則虛矣賊整堅處不擊擊其隙瑕則虛矣此對陣之虛也而攻捕亦恆有之賊麇聚時不擣擣其出散散則虛矣賊整備時不捕掩其不備不備則虛矣此攻捕之虛也而未戰未攻之先亦時有之賊欲窺我必先偵知我之敬怠虛實我日常訓練金鼓喧訇磨勵氣勢足奪賊膽是擊賊於操場也我時行巡徼旌旗載路振揚威武足沮賊謨是擊賊於野外也我夤夜伏途出沒不測遇則輒獲使彼不敢竊越是擊賊於宵夜也我城卡森列守詰嚴密使之不敢輕犯是擊賊於堞間也由此類推所謂聯近助結遠援修外交制幾先者莫非

用於虛而效於實故雖未直接擊賊而賊自遠處處制賊賊不能加我一矢又何待血刃哉然必有其實而后可以用其虛其虛貴密其事貴勤所以如此者則以鄉團貴守戰乃不獲已耳欲不戰而屈人之兵非我勞不可而愚者不知反以我勞爲苦庸詎知所以使之勞者正所以重其命也重其命者不使吾良善之民與狂賊拚生死於槍火之際也然則欲求不血刃而保全勝者其惟善擊虛乎

七曰能守正則百邪自遠

正理者天地之妙用正道者人世之綱維天地不變故正道終不能泯雖有盜賊言惡行惡恣睢亂世未嘗不欽正人方其劫奪固不恤乎人之正與不正及夫事過境遷又未嘗不以正人爲可敬重者天良見也君子行己接物蒞職處事無不軌於正者非爲亂世免禍然也惟守正乃能免焉其不免於亂世者常

人耳力不足以自衛德不足以感天故或有无妄之災若夫膺團任事政由己出將以正人之不正此其自處寧有他哉亦惟曰正而已矣以守正之心行純正之道保克正之民上符天心下合民情則天人交助鬼神扶之輿論順之逢凶轉吉化險爲夷有必然者在人自爲之耳故君子於斯世也惟患其不能正不患邪類叢生惟患其正之未至不患亂世之難行竊嘗以事類觀之彼匪人者雖甚忌恨辦團之人然其將爲禍必先索我瑕疵而后敢發難苟我之處公處私悉歸於正而無一事失當將有何隙可爲彼乘加之團力周防又足以降其心制其命彼亦避強凌弱耳何必故與爲難而求不利耶夫子曰君子義以爲質禮以行之遜以出之信以成之易曰明夷利艱貞晦其明也內文明而外柔順以蒙大難文王以之能味乎此則於處亂世尤宜矣人以亂世難正吾謂亂世正宜守正耳處正有道亂亦寧也明夷艱貞之利豈爲治世設哉然則欲

求遠邪免患於亂世者亦惟守正而已

八曰不貪利則大害絕無

貪利者禍之媒也不義之利害尤甚焉夫鄉團之與營隊其道不同而外匪之與內匪制法亦異遇匪即勦惟營隊宜然鄉團則以自保爲義匪之在內者肘腋爲患不能不治若於外匪則但期其不我侵害而已外匪苟入境而犯我擊之可也不我犯者防之可矣亂世風雲朝暮異色蒼黃變態若不審強弱妄窺資械拾取畸零未能殺賊反而召寇致令羣起謀我小則侵掠邊境大則搖我本根其害可勝言哉鄰境各團來往之人我團何能盡識其人實爲匪而假軍容者有之實逃伍而潛爲匪者有之容裝相似行徑全殊今日爲匪明日投軍引類呼朋潛機種禍苟利錙銖隱懷報復生心效尤積久成習一旦暴發悔不可追縱或倖免一身之危而其境內良家已被池魚之禍近世理團者每多犯

此矜能羨獲不戢其下肆挑敵氛召羣匪之同仇以致顛覆可勝嘆哉故欲不
招大害必自不貪利始

九曰慎保守毋輕開費

鄉團之職以保衛爲事者也鄉團之治以境內爲責者也自世亂匪充到處塗
炭於是到處設團以自衛本團境內之匪吾得而治之本境以外之匪非我一
人可得而盡治之境外之匪於我有犯者吾猶得而治之若其無犯於我雖甚
暴厲而無所因我即不得越分而謬治之則亦惟戒吾人慎守吾境以保吾民
使匪不得侵入入則受創如是焉耳矣若忽畧已責妄動以挑其鋒遠出以邀
其利兵連禍結匪攻於外民怨於內縱有鄰援不可長恃此所謂敗道也夫非
不欲盡匪而除之也孟子曰惟天吏可伐國惟士師可殺人今到處皆團而到
處皆匪匪之所棲者非團則軍耳彼未嘗約我相助以治其團內之匪而我乃

越俎以代或不相關白而躡跡界上以伏擊境外之匪此所謂非人情夫邊釁非有所大不得已斷斷不可開而淺躁者輕之自以爲激義憤弘仁理或赴救鄰團或奉檄軍府勇往直前不顧其後難哉難哉夫他團被禍雖不在盟救災恤鄰而往赴之同乎禦匪其猶可也軍檄之來則有間矣命我緝捕待事境上扼要設伏堵賊險路所職在防張網從禽以巡擊攻剿聽軍之自爲豈不可者若其檄我使鬥疲我便敵調我越境虛我後防以我爲兵而兵自爲守以我嘗賊而賊委與戰其情其勢非一鼓可擒而我乃長此被置於爐火之上連村比寨盡至毀冢不知命在何時惟視軍隊去來以決死生之遲速此爲何如事乎世之蒙此禍者多矣邀暫時之寵利召非常之災殃皆不思之過也故欲保民必戒啓敵蓋與不貪並重矣

十日勤平訟自致和寧

鄉團之於平訟雖若非其本職然亦不可諉也欲攘外必先安內欲安內必須和衆平訟者所以致其和也慨自鄉制廢墜治教陵夷民風之頹壞久矣稂莠之徒自以爲官府甚遠鄉井莫如之何暴戾恣睢機械變詐弱肉強食侵掠侮弄而被害者貧則不能訟懦則不敢訟愚魯則訟亦不能伸怨氣填胸喧啾載路苟坐視其備受侵凌而含怨積忿與強暴者之橫行無忌而釀成股匪則何以團爲夫鄉團之訟不必皆大端也大事大故自當聽其赴官若乃細瑣尋常或因公而涉私或事簡而情複無時不有日號於門有雖驅之赴官而不肯去者又安能一一強推之以重其困此其勢不得不爲之平而其平亦不必盡置諸法理平則事解情平則訟息其爭即自止矣兩造之來以鄉情解之論其是非抉其隱曲曉其利害理其偏私了其事故俄頃而歸各安其業片言折之耳是調人之職也則亦何傷於平設有強梁頑悖作奸逞暴其時未久其黨未成

其兇未甚因一端之偶發稍事懲責繼之以約束使知儆懼其身不至流而爲匪他人引以爲戒乃團政所重正賴有此一平評而不得乃達於官官民相濟政乃以成不如是不足以制莠安良息爭而和民間閭之內乖戾紛紜飲恨成仇互爲水火常時且不得團其心一旦有事又安得合衆人之力以成禦侮之功哉故平訟非團中附務息訟實團治安要圖也邇治弼教其基在此識治道之君子當不河漢斯言

十一曰教化行而民過自寡

天生蒸民具有秉彝其妄行非僻以干刑憲者雖成於習染實起於誘惑不有啓迪將終迷悖故凡負治民之責者即有教之之義而况團務作用將以化匪爲良撥亂反治不於幾先爲術以教之化之則良且化匪亂將何已學校之教吾不得而主之矣鄉曲之教牖啓平民導其爲善則隨在可以行之然必委其

任於專人責其效於久遠非一手一足之勞所能兼勸懲獎禁之設施雖可行使於操練巡防之際終不如專務之力久以深也雖可表著於政事酬酢之間亦終不若禮義之腴澤以悅也推舉專紳資其德望分投各處宣佈教條首則詔以綱常倫紀之經孝弟忠信之德尊卑長幼之序次及民生日用之常言行善惡之分人已和壹之理又次則及於邪正禍福之戒恥辱刑戮之威遷善改過之義而皆推原根本就其事體定爲規節明示好惡因地因時即事即人而行之考察寓乎其間懲勸隨於其後積久成俗自能返朴還醇邪僻革心淳良安善駸駸乎禮義之鄉斯我之教化行矣教化既行民之犯於有司者自寡此正本澄源長治久安之道豈刑制之所能逮哉然必先之以身作則乃可收功於後漸行漸效匪伊朝夕鄉團地小易治耳目相接宜首試之矣

十二曰威信著則匪萌自銷

世無不可孚化之人特視吾所以處之者何如耳政事脩教化行則境內之匪息所患獨外匪矣夫外匪亦吾民也有天良知是非具人心識利害故信義可以服之威武可以讐之大抵匪類之禍民也利其貨寶窺其器械非必有深仇大怨故遇強則必避弱則來乘民患不自強耳果能自強彼即憚懼然締造之初其強不著彼或乘弱侮我非力敵一二次不能却退倘彼逕來我地掠我資械戕我人民則當急設計謀殊死對敵使彼不能全歸歸而竄踞遠方我亦必分遣多人察機俟勢謀所以珍滅之不殲其魁不止風聲旣樹餘匪自不敢輕來犯我則威武之效著矣若其不犯我地我固不必勉強干涉即其通道來往行出我途其人於我境內素無惡蹟我未必盡識其姓名則亦何必不許其自新即或與我團民有爭我必酌情準理公平處決不以非類而稍有偏抑其他事類無不如此則信孚矣威信並著足奪其心而吾之所以處己處人者又皆

悉出於正風聲旣彰自能消其窺伺之志若彼投身軍營函使相告吾又必慰
藉之告以正道啓其善心彼將懽欣向慕而改行我復何有境外之患蓋境外
之匪原各有所隸之團苟彼無害於我我亦不過以他團之人視之而已然此
特以在人者論之也若在己則不可以恃此而稍涉於驕恃盈驕矜於天厭人忌
書曰余視天下匹夫匹婦一能勝余一人三失詩曰戰戰兢兢如臨深淵如履
薄冰欲求保此艱難之局以傳永久者其惟憂勤惕勵敬慎始終而加之以謙
遜庶幾可以無失乎

右團謨十二章大抵務本自固之義爲多然非憂勤奮勵不能奠定安謐
尤非兢業戒懼不能永固長甯書曰若藥不瞑眩厥疾不瘳詩曰如切如
磋如琢如磨自維固陋畧抒管窺凡我同人詢謀咨諏日求高明以進乎
此則爲益多矣

附論上鄉兵

竊嘗有感於世之制兵矣兵者國家之大政教兵者國家之大事也兵可百年不用不可一日忘備者也古者兵農不分文武合途即民即兵無不通講後代則歧而二之專恃營伍遂棄鄉兵以爲寓兵於農難而隨時募練易不知民既不習於兵則政府統制之力減少國本先弱平時猶可粗安一遇國勢危急兵額不支乃徵用人民倉卒召集形同烏合素未選練難別良莠駐則毒民戰則逃陣雖有善將亦徒敗挫一隅未靖四方盜起民不操兵將莫能制遂使亂及天下可爲太息且兵民分歧尙有弊焉介冑不識詩書章縫罔談戎陣文武異道素相輕蔑一遇外患迫來議論各異將握兵而不能體國之全相持權而昧于軍旅之事兵謀不習則論敵多畏遂終於議欵議和自甘卑辱雖有志之君能武之將亦終爲衆議所搖奪寢以削弱卒至危亡此又累代之覆轍可爲痛

惜故聖王寓兵於農平日教戰美意良法不徒爲亂世而作也今若欲求安邦固本之道則莫如復鄉兵復鄉兵必起鄉治乃爲無弊起鄉治即鄉團而修之不假外求家出其丁則比戶皆兵里各有守則到處皆險教之有道練之有方情誼相浹志氣相投居則同安守則同固戰則同仇可以一鄉可以一邑可以天下可以保境可以禦敵雖國勢安危在乎朝政之得失專閫之良否而本源潰亂土崩瓦解之事斷其必無矣古之民所以能長安久寧者以有鄉治爲之理也故觀於七月置兔之詩而知先王教民之意所以入之者深觀於采薇杜之詩而知先王用民之力所以體之者切是究是圖亶其然乎

附論下

鄉治

竊嘗因論鄉團之體推及鄉制而致慨於後世之治不復古若矣一在於難其人一在於失其法王化之本雖樹自樞府而王政之基必起於鄉里經界學校

統治教養皆鄉制之要先干所以經理規畫者今已蕩然將望之於中央而中央方務軍國計慮不暇爲也將求之於行省而封疆之任方亟於承流宣政不及爲也將期之於州縣而牧令之官方疲於庶務叢脞又不能爲也則亦將何時而得爲哉夫州縣爲親民之官固無事不當慮矣然古者以衆材共一邑今也以一人專一邑百里之廣政務之衆萃於一人之身加以末世訟獄之繁日不暇給壅遏叢沓又安能分精神窮智慮爲民生求至計於尋常之外故鄉治之廢累代莫修人心日壞風俗日靡獄訟繁滋盜賊充斥強凌弱衆暴寡智吞愚邪說左道紛綸衍溢莫之能止世道何由得不亂耶夫鄉治之道固不一途然欲求其至善則必以制產爲先制產莫如井田今雖難望猝復均田猶可議行蓋行均田而有井田之意經界即在其中起鄉治而藉鄉團之基規模亦藏於內均田者計其地之廣狹量其民之衆寡姑以一縣計之酌定其一夫授田

若干之數畫爲定界永不許移計丁授田不得買賣通一縣之積必使酌留餘地以爲後繼地有餘則許民典種人有餘則量移他所其不願離而無地可授則令分耕父兄之業而不得改易其界鰥寡戶絕收授餘夫等制畧如井田之法貧者嚮典富人之田歲本出租今以富者之餘田析授貧者而令其分年歸價則貧者與出租無異而富者價不終空無墓地者官量予之法行而事無大擾產均而情不甚乖游民皆得有養徭役無慮不均田賦糾蔓之訟自少奸奪蕩廢之風寢息蓋亦即井田之意矣鄉治者即鄉團而定其戶口之數使之相埒合數團而爲一總合數總而爲一鄉合數鄉而成一縣今之保正村約固不異乎古之比閭族黨今之團長牌目亦無殊於五兩卒旅責保正以興庶政課團長以績武功任糧首以督賦役廣明正學以端庠序之教尊崇耆德使職風化之權其他如課農之官調人之職司市之吏皆以時舉兵農治教亦以時興

所貴得人尤期實事今之鄉治不行皆由於輕其事賤其職不榮不祿無方策勵才者別趨名利而不肯爲爲者勉應虛名而不實行或強以單丁貧戶充之更難責備民如散沙治所由替故爲今之計者在於明其規制定其品秩條其職事重爲鄉職選賢舉能優榮徵辟假權授祿責其實效量能甄勞予以遷進限年課功黜陟幽明選舉必由鄉里大德大賢不次待遇中材之士不先經試鄉職有效不得擢進邦國之選人材絕無倖進政治始臻隆休蓋亦即鄉遂之意矣二端既舉衆目畢張教養兼修兵農並重不惟足以挽救危局直可追縱先代竊願與有心世道者共圖之

健齋辦團文錄卷二

富平楊昌年紀五

規約

初訂簡章宣統三年冬

一曰編牌哨以定約束

一團之內各就所轄地勢分爲幾頭定名曰哨

或曰社曰頭各從其宜

每哨置一哨長領

之司教練巡捕諸事戶多者酌添幫理一人副之所管之戶十家爲牌置一

牌長通爲若干牌統歸哨長率之以受約束於保正團長莠民不許入伍

二曰飭器械以嚴武備

長矛利於上操出隊務須丁置一根黃鱗尾用以防家各自量備來復鎗則有力之家各置一桿家大者置數桿腰刀亦如此例擡鎗每哨須有數桿大

礮則就有城堡處酌爲備製子藥寬儲不得缺誤團製團旗哨置金鼓號令
公中籌備莠民不許藏兵

三日勤演習以精技藝

凡團中人須精武藝日間演鎗撻靶命中夜晚習矛舞拳刀棍隨宜精進不
息務成勁勇擡鎗大礮隨時演放務令精熟以備不時之用

四日合較閱以嫻戎律

各團各自會操每月二次日期自定至其日小戶出一丁大戶四丁出二六
丁出三齊至操地一家不遺有事告假不得逾十分之一四團合操每月限
定一次以某日會於到賢鎮適中之地大團額數百名小團五十名到賢鎮
團衆就地出操無奔走之勞照依大團額數加倍須出二百人至期日各團
人等辰時早膳巳時到場試其坐作擊刺之節演其分合變化之勢較其高

下加以賞罰其有失期後至以及首領不到者俱在罰列

五曰分地段以專責成

各團村堡一切常事屬之鄉約戎事屬之牌哨諸長各專責成同司保衛至其所轄境地團與團指明界限所屬道路哨與哨分定段落地在某團事歸某團措置路臨某哨即責某哨巡察其交界處所兩處會同辦理安集閭閻保護行旅失職者罪之

六曰明斥候以速呼應

各團臨近要路之村堡飭其哨長輪派村人不時登高瞭望以防寇盜掩入以及行旅被劫其有瞭視所不及者如遇有事在野耕夫亦須號呼護救不得漠視至於各團首領所在之地不論臨近要路與否並須於高敞處所多置烽烟燧火之具小匪小劫團哨力能自捕則止鳴鑼放礮爲號不必更舉

烽燧大劫獨力難制則於鳴鑼放礮之外晝日發烽暮夜舉燧告急請援其有匪勢稍小止欲附近一團相助者則亦止發一烽一燧若欲四團合至者則三烽三燧並舉如此區別庶不至輒擾全局時新團地面寥闊東境聚賢村西境修禮村惠店等處併得量地安置烽燧以便呼應

七日慎巡防以固封圉

城垣屋宇補葺殘缺城門必置守者城堡必派巡更巡更必數人失盜被劫更夫不能先覺必受責堡外轄境行會哨之法哨長每夜輪流派人出堡巡遊與鄰哨相會每間五日之晚一團各哨齊至一處相會均須暗約地方申明口號每次更移不使人測通衢官道行巡路之法除近路村堡隨時防察保衛外仍責成其本管團長每三五日派人輪抽各哨團丁若干名遊巡一次以防疏虞至於四團全境擬於若干日輪派一團環遊一次更於若干日

徵集四團環遊一次其法容後酌定以上巡會之法俱係農忙停止農隙復常

八曰重策應以齊羣力

策應之法本團有警各哨齊救先定留守以固本次申口號資識別結隊而出勿亂勿囂既止其地孰擊孰截孰伏孰追各相機宜合商進止事既定本哨長慰勞之團長論其功過獲賊者賞不至者罰外團有警各團赴救以烽燧之多寡定救應之責任一烽一燧近團獨至三烽三燧四團合至事既定本主暨本團長慰勞之團總論其功過均如上法

今以四團之地分爲六區知新維新志新各居其一時新團獨得其三以其本境到賢鎮爲中部韓家堡聚賢村爲左翼惠店修禮村爲右翼其相應之法知新團南應時新團之左翼西應維新團維新團東應知新南應時新團

之中部時新團北應維新西應志新兼自顧其左右兩翼志新團東應時新
中部西應時新右翼時新右翼東應志新兼自顧其本團中部時新左翼北
應知新兼自顧其本團中部此比鄰各團相救法也若諸團合救則不以此
爲例

九曰修庶政以飭紀綱

振委靡頹惰之風銷虛僞浮滑之弊祛畏葸恇怯之氣聯渙散離析之情鼓
舞作興陶鎔變化分張衆職簡任賢才大小事務必爲區處大小嫌怨必爲
調釋小事爭訟並爲剖斷本方姦宄通匪窩匪爲匪者必懲外至刁民帶鎗
帶刀帶劍者議處但有形迹不正俱當加意盤詰小則驅逐出境大則查明
送官失盜被劫激勵哨長嚴行捕捉有犯必獲既獲必懲安良守分力加保
護有抑使伸有冤使訴鰥寡孤獨勸令親鄰撫恤忠孝節義存俟公舉旌揚

其他未備之法待舉之事仍須博採周諮循序漸圖焉

十曰隆教化以正人心

惇天敍之典父嚴子孝兄友弟恭夫義妻從姑慈婦婉朋友有信宗族和睦
戚黨相嫻謹庠序之教隆師明道教以窮理正心修己治人之術修鄉約之
法德業相勸過失相規禮俗相尙患難相恤正里巷之俗男女有別長幼有
序廬井有禮子弟有學其相處也敦本尙實明恥重義興仁講讓敬老慈幼
出入相友守望相助疾病相扶持如此則人紀修人心正風俗萃美藹然禮
義之鄉豈謹有裨區務已耶

十一曰張禁令以革頹風

務賭剗牛食用禁物私販煙土私帶鎗刀男子武斷鄉曲婦人潑鬧街巷放
礮影響公安穢罵輒及通衢強贖禾苗踐毀田園強凌弱衆暴寡惡侵善富

吞貧有事不受調處動輒私相鬥爭不計是非每興誣訟諸作非爲干犯禮法者悉禁絕之不聽者麗于罰

十二日行賞罰以課成功

凡各團首領以下辦事勤敏教練有方巡防無誤捕賊有功者辨其大小分別特勞常勞二等特勞隨時褒獎常勞年終彙賞失職者咎之凡各團散戶辦事勤勞捕賊有功者論其大小小則本團酌獎大則團總公獎爲其首領者當先錄報無隱其有不服約束不聽指揮桀驁犯上凶暴陵人不演鎗矛不從巡捕不上操場以及當操離亂部伍喧笑行列操場爭競私事者罪之其有持身不孝不弟不睦不嫻不任不恤不聽教育造言亂民阻撓團事破壞團局作姦犯科比匪行盜干犯禁令者懲之搶婚者以匪徒論將鎗礮私借匪人致令犯事者以通匪論

右所具簡章十二條畧舉規模尙未詳備然行之有效即可稍救目前之急若更能發憤自強因其所已詳而圖其所未備者以爲長治久安之術則尤地方之福同人之幸是在我團諸君子以及團衆人等共凜危機同懷永圖實心實力是守是行庶乎苞桑之戒克孚磐石之安永固矣天方艱難寇禍日熾各宜猛省勿謂具文

初辦約規

宣統三年冬

一孝弟爲居家之本忠信乃立身之基崇禮義方可作人尙廉恥斯能改過睦婣浹族戚之好任恤結鄉黨之交三綱五常四維百行皆人人不可忘而終身不可離者也宜各自勉期無負我人所以爲萬物之靈者焉

一凡廟宇神靈悉皆聰明正直者吾人祈福須具虔誠至於演戲勞民傷財少演自好不演更好少年婦女華粧賽會因之混雜擁擠壞風敗俗稍知羞恥

者當自愛惜而勿與焉蒙以養正時貴如金讀書學生不必放假看戲若必須放時以一日爲限此僅舉其太甚者耳

一洋煙之害人皆知吸者害已種且害人貪安貪利於一時受窮受禍於多年況且國家明令嚴禁盍不戒除更自求禍豈甘心流爲下愚耶

一同心同德排難解紛古之善教凡有雀角鼠牙睚眦釁隙者能容爲上能忍次之萬不能忍必先投知鄉約管理管理不下啓知鄉老又不能下方許控訴倘徑控訴抹煞一切以違規是論公稟貶之

一忤逆父母毆辱尊長犯者送縣按律究治凡小兒犯法罪坐家長婦人放潑咎及本夫一切徇私忘公利己自便者各隨其輕重治之

一執械行凶窩藏刀匪緝拿送縣一律坐罪然青年子弟初次錯誤被匪引誘受其挾制後來悔過欲反正而不克自由者許其父兄報知鄉保查明果係

實心改過應准合聯同力保護以開遷善之門若本人不啓知保約商量處治私意報復者不惟不肯護救反以違規是論

一爲防匪人夤夜結黨姦掠及白晝擾境滋事恪遵縣諭巡更守夜日嚴查夜嚴守務令匪人無從溷迹一旦有警鳴鐘爲號各堡鄉約即刻鳴鑼傳喚牌頭率領各堡丁壯執持器械跟隨保正總約奔赴有事之處竭力捕獲來者償錢二百文能格外出力者合聯公議舉爲義勇壯士並予重賞不到者以黨匪爲寇是問凡我同人務須擴懷大公力顧全局即或遇事之家與己素不相睦亦須捐除私怨慷慨操戈赴救切勿懷私嫌而廢公義如落井而下石焉倘有此等情節定即照縣主來諭送縣以憑懲治不貸

一聚賭招盜致惹事端犯者土著嚴究客戶驅逐然良民近來被竊者頻頻以及連年受賊害者皆因不清查戶口之故致令良莠雜處坐受其災由我自

取於人何咎今後各約務須認真稽查勿忽爲要倘經他人告發有徇隱等情責成本處鄉約以窩藏之罪

就職約言

民國二年冬

一四團團總之任係受舉於民非受任於官日後但見官符以昌年名字相加即不辭而去

一王尊一楊豐年爲副團總王海帆皇甫子晦李子平爲團紳同辦團事其他應用人員從容酌派

一各團自保正團長總約以下悉受約束稟號令聽調遣約期必信奉事必敏不逾刻晷不憚勤勞視公事即家事一洗從前委靡敷衍搪塞之習

一各團衆無論貧富老幼士農工商須共奮雄心同力合作富者輸財貧者出力惕於禍患亟圖自保勇於從令如順父兄痛除從先渙散畏怯虛僞浮滑

之弊共爲一方性命財產保衛之圖

一進退人才之權團總得以操之嗣後各團自保正團長以下遇有更換推舉團總須預聞其事其有辦事不得力不如法者團總得以飭令更換革退如有應進賢才團總得以隨時飭令增進務令賢者在位能者在職布滿團列一長不遺團總多病之身並得於任事後察酌情形遴用代表公籌安置取材不限地域以收爲團得人之效

一賞罰之柄團總得以主之團練之法事同軍政有功者當賞有過者當罰不得以私情瞻徇請託妨害公議

一四團通力合作遇有應辦事件須聽團總於四團之中擇才調遣不得此疆爾界意存推諉亦不能以奉使者非本團之首領拒而不受

一凡事固難於圖始尤難於圖終四團總務今既締始須貞之以恆啓閉團操

嗣後須聽爲首者公決行止不得隨意解散

團制二條 民國二年

團分五哨哨有長即總牌長每哨二隊一隊刀矛二隊鎗礮亦各有長即小牌長每隊之

間加設伍長一名分任其事前後左右鎗隊四哨皆用小鎗惟中哨兼用擡

鎗五哨編隊之外各有餘丁以及童隊概入中哨歸團總握之作爲護兵隨

宜調遣其約束之制五人聽伍長十人聽隊長隊長聽哨長哨長稟號令於

團總團總隨身司號礮一人司號角二人司金鼓二人司令旗一人司傳送

二人司武衛八人團總臨場聽斷訴訟環列侍衛逮捕過犯執棍行法等事不另設額即由各哨隊內提充司巡查二人不另設額就團

中哨隊各長內隨事酌遣團總所與共團事者司贊畫數人無定額就團中耆德高年俊彥時髦以及總約鄉約哨隊各長隨事延訪

司教練二人不論本團外團擇能者任之宣文教數人無定額以各學塾儒師當之司書記一人掌文告司

貨幣一人掌錢司法一人掌賞罰科條簿籍團總臨操將罰有過必先額問司法該當何罪司法檢察科條舉而以告賞亦如之司調

數人掌解排糾紛息和爭端人無定額臨事酌遣自司贊畫以下有其人則備無其人則闕之五哨

之地平日分爲四區各有總約四區村堡各有鄉約約總之職布內政以理團民通衆志以和團民哨隊之長修武備以振團民殄寇暴以衛團民而皆率其屬衆以受成於團總團總比而率之以受治於官府焉

旗章每哨二面各按方色中哨黃質紅緣前哨紅質藍緣左哨青質黑緣右哨白質黃緣後哨黑質白緣矛必重英長約及丈鎗必來福烘藥火鎗次之每人必備腰刀一柄持矛撐鎗之士臨操負於背後護兵不持矛鎗者懸於腰間而鋒皆須銛利

團令 民國三年

在團之士平居無事日間演槍撻靶夜則練習刀矛拳棒雖無常格不得懈惰無故久不演習者查明究處童子力能持兵亦教之演習必使良氓無一不

成勁勇

農隙講武每月兩操約以十月爲始小戶家出一丁大戶出二三丁每屆操期

先一日哨隊各長戒備於衆稽額數簡其兵鋒至日各帥所屬齊集操場不

得過午過則有罰

科條
在後

一月之內只有兩操所編隊伍已成定額縱有私事

亦須移前攬後辦理謄此一日非遇婚喪疾病先期遠出毋得藉故不到即

有婚喪疾病先期遠出情事須白哨長酌擇餘丁頂補足數毋得缺額必係

餘丁不足或無餘丁可補始許哨長回明團總懸俟下屆補操如無故不到

或以些小事故輒即藉端規避懷私廢公不恤大局定即從嚴責處

科條
在後既

至操場各依指定地段按方駐紮靜候團總臨操不得擅離部位屢入別哨

別隊始終肅靜不得誼譁鬥爭笑語譏彈

團總將至各哨齊起分左右列隊立團總既至升炮三聲團總從中行過

中哨
護兵

先拱手向左右致慰左右亦拱手答敬團總升座各哨移隊橫列于場前北

向作一字形

人多則重行擺列

持矛者稱矛

豎舉之銳向上

執槍者舉槍

豎舉之口向上

護兵懸刀

倒懸之首

垂地俱北面拱手

械不釋手

致謁見禮團總及在座者皆答拱各哨收隊仍歸本方

駐紮聽候點操

開操首較刀矛號礮一聲司令者麾旗傳令擂鼓一通各哨戒備擂鼓二通前

哨刀矛隊進至操場一字成列西向北上三通鼓開操二人比耦而出號角

一鳴金鼓齊作出隊之耦吶喊擊刺三進三退進三刺退三刺凡十八刺既

訖周旋循場西側而下列于本隊之左其行如規次耦繼進悉如前法但不

鳴角比耦既徧迺合一隊之士為一大耦三進三退亦如前法若有次隊繼

進亦復如之前哨操畢周旋循場西側而下復歸本位左右後中護以次進

操退歸悉如前哨五哨咸畢迺少憩

演槍位於場西五哨以次遞進畧如演矛之儀令既發一鼓戒備二鼓成列三鼓當操之隊進至操所一字橫列西向北上鼓三點一人出伍進三步立俟鼓令鼓擊邊板機瞄準擊邊時鼓忽重擊一聲應節開火如是三槍中者金鼓齊鳴助彩不中則否演畢復伍次者繼進一隊既徧如演連環連珠排擊坐臥等槍進退起伏前後左右等法則加以口令仍以金鼓爲節否則鳴金聽金聲席捲而退周旋而下如與刀矛夾演則以刀矛居前爲一行槍手居後分爲兩行一併橫列每持矛一人後列二槍頭行槍手聽鼓聲進至隊前連珠坐放訖聞號角一聲矛手喊殺進前三步立定次行槍手復聽鼓聲齊進矛間坐放或連珠或排擊悉依鼓音進退起伏左右轉變亦皆加以口令務依節度五哨既訖復少憩連珠連環槍之鼓擊邊擊其中心如滴露排槍之鼓擊邊後金鼓齊擊一聲進則鼓之退則金之偃旗則伏舉旗則起槍止

則矛手挺矛矛豎則槍手開槍

警號 民國四年

凡遇匪徒入境搶劫若係小股本村力能自捕不必號呼外鄰倘人數衆多或黑夜奄至必須合力兜捕則有鐘之處即速鳴鐘鐘聲連續緊敲不拘定數白晝堆柴放烟能加狼糞更好夜晚放火醒人耳目俾知賊之所在有槍之處或槍礮亂響或梆鑼亂敲仍須白晝放烟黑夜放火以便救應

鄰團聞警擊鐘傳人救應亦須連擊但每五聲一歇不必加放烟火庶有區別如能暗傳團衆不用鐘聲亦可

倘賊匪奔逃號召四面截捕者其鐘聲連擊每四聲一歇四面鄰團即以連四鐘聲應之村堡人等一聞連四鐘聲各執兵器出堡探望截捕

若尋常傳人議事者其鐘聲緩敲每二聲一止傳人操演者其鐘聲緩敲每三

聲一止

凡遇有警擊賊聞警相救賊逃截堵無論本團外團白晝須張旌旗夜晚須傳口號庶易別識而免錯誤

口號

今按每月三十日每日編定二字作爲四團公共口號某晚有事即照某日口號呼應庶不自誤若遇非常大故必須另傳口號者屆時密傳不在此例

操場禁令

民國四年

行必成行止必成列駐紮必分部伍擊刺進退必整齊嚴肅目視旌旗耳聽金鼓心專號令衣帶必整飭手足必端正容聲必靜肅器械必精利荷槍稱戈必如式違法者具爲罰章如後

一凡私操家出一丁家大者四丁出二六丁出三其餘以此類推遇操齊到如

有婚喪疾病等重要事故確不得到者須先告明本管小牌長小牌長告明總牌長總牌長轉告保正團長准其請假不先啓告者責以慢令自便之咎其無婚喪等故而輒規避不到以及明知操期先事出避者概行加責官操人數另有定章不在此例

一凡遇操期各村堡總鄉約大小牌長亦須齊到其有婚喪等故勢不能到者亦須告假不告假而擅行自便者亦加詰責藉小故而不到操者亦行科罰

一凡遇操期須午前齊到操地過午者有罰一人後至責在本人一堡後至責在鄉約小牌長一路後至責在總約總牌長一團後至責在保正團長

一凡團中童子來操概作餘丁不在正數之內家無壯丁始准以老弱應數如有壯丁而輒以老人及童子應操者議罰年逾六十而筋力又衰朽者免操仍在本堡代衆看守門戶雖六旬而未衰朽者仍須量力從事操巡諸事

一凡操場各有部伍離亂雜越者加責途中行走各隨旌旗不得三五斷續如有行動自由者亦必加責本管大小牌長不行約束者罪之

一凡操演刀矛生澀者鎗礮失火者私下不演鎗矛者概行棍責

一凡出操時鎗礮缺子藥刀矛太朽鈍者分別責罰

一凡軍事主嚴肅操場演陣演技失誤自笑者決責旁觀譁笑不聽呵止者決責憩息之時謹呼怒罵者立即呵止不服禁止者決責操場爭論私事者決責因而鬪毆者重責

一凡團丁無論出操在家不聽本管頭目約束指揮教詔者概行棍責本管頭目以非理御下者罪之

一凡操畢時須待本管保正團長有散隊之令團衆方得散歸仍須結整行列不得闐亂如首領未去而先散歸或擅退者決責其有十分要故不能久待

者當先告明保正團長允而後去不待啓告而私去者罪亦如之

聞警救應辦法

民國四年

到賢鎮 西城 惠店 修禮村 聚賢村以上五處城上各置大鼓一面或

數面

莊鎮 仁義坊 城上各懸鐘一口

夜晚之間倘覺有匪緩則先遣人出報事急或被圍人不能出則以鐘鼓求援雖已鳴鐘擂鼓仍須設法遣人出報庶知匪情 南邊各城某處有警某處擂鼓各團聞鼓掌號起救 北邊各城某處有警某處撞鐘各團聞鐘掌號起救 無事掌號數聲一歇有事求救號聲連吹不止隊伍行走之法已經口授臨行時懷中可藏雙響紙炮五六個既至近匪之處先紮可以蔽身之地如欲使城上人知其已至可放紙炮三個以爲暗號今將救應隊伍配

定以專責成

修禮村惠店有警仁義坊由北路赴救到賢鎮及西城由南路赴救莊鎮遙爲聲援相機進止

聚賢村有警到賢鎮及西城由南路赴救仁義坊出城遙爲聲援接連莊鎮聽候調遣

仁義坊有警到賢鎮及西城由西面莊鎮由東面赴救修惠聚賢均遙作聲勢到賢鎮及西城有警仁義坊由其北莊鎮由其東赴救修惠聚賢均爲應援相機進止

莊鎮有警仁義坊由其北或稍北赴救到賢鎮及西城由其西或正南赴救修惠聚賢遙爲應援察匪勢及本城情形以爲進止

以上配備專爲夜晚救應而設凡應赴救之團一聞警訊不待總團號令

即須火速去救更不得以他辭藉口如若赴敵遲誤以致失事定依情形分別輕重議罰以指定之團首領人等是問

至於白日告急遣人鐘鼓號令亦如前法出隊救應須用旗二面

以備分隊

莊鎮

黃

紅邊

西城紅

白邊

到賢鎮五色

仁義坊皂

藍邊

聚賢村紅

綠邊

惠店花

白日救應較晚間尤須審慎先察是匪是兵匪可直打兵須斟酌如察其是兵而未得公文知會明確以謹守勿令進城爲主倘彼叫炮一二聲切勿輕易還擊如實來撲城方可開火 赴救之團亦照夜晚配備行事火速整頓隊伍但須察明情形是匪可以直擊截捕是兵滋事則先斟酌遠近擇地布置或隱或現以壓其勢使彼膽寒不戰而自退爲上策此在各團首人詳慎酌奪妥定分寸總以不誤事不激事爲主如果可緩則報明請令可也設若事急城危或是大掠財產當救不救以致失事亦必嚴罰仍以指定之團是

問

以上各節望各用心看記妥慎遵行總團一處照應難周全望各團互相救應各有身家宜深自思勿待督責是所切望

團防急務六款

民國五年

爲通告事照得南寇不靖團防吃緊本地匪徒難保不藉機鳴張蹂躪鄉里亟應妥籌抵禦以安閭閻除另具簡明告白張貼告戒外所有應行事宜合開於後

一操練宜講實用勿事虛文自布告日起各團應飭大小牌長董率團丁每日各於堡內規定時刻按名演鎗打靶一次務期命中每夜按名演矛以及刀棍務令精熟倘有疎懶違抗託故不學者即由牌長報請責懲俟屆本團會操之時團保臨場驗靶擇其命中者酌賞錢幣生疎太甚者擇尤責罰某

牌人數多中賞及牌長中數過少牌長受罰演矛出色亦給特獎其藝太劣亦予責罰勸懲牌長之例亦以其管下人藝之優劣爲權衡團保不能實行課督並受厥咎

一各團軍器除現有小鎗外並須各按村堡量置抬鎗大礮若干以資攻守每小鎗一桿另備火藥三二斤子火各百枚存備急需尋常不得動用抬鎗大礮所需子藥分別公私均須寬籌儲備以防不測限五日辦齊不許拖延以上子藥槍礮備辦情形保正團長並須親身查驗其已否辦齊切勿被其瞞過倘或空口支吾查出重責因而誤事定用軍法保正團長漠不查究並麗於罰

一各堡城垣應修補者急須修補堅固堡內花戶因派工而違抗撓攪者即由鄉約牌長報請究懲鄉約牌長坐視殘毀而不督修者罰亦及之

一各團村堡均須搭蓋更房每晚巡更守夜並須數人共守不得僅用一人以防竊睡其家免致誤事獲賊者有賞失事者必懲打更之外又須派人出堡會哨不得疎慢獲賊者亦有賞不至者亦有罰保正團長激勵鼓舞密察勤惰倘致廢弛定行譴責

一嚴察本地有無奸民通匪窩匪糾夥煽亂剽掠鄉里情事應由保正團長不時派人密切訪查一有此輩立即掩捕剪除務須早絕萌芽勿使蔓延寢衍坐受其毒倘有疏虞惟各團首人是問

一緊防外匪蜂擁搶劫應飭各團首領以及鄉約牌長不時派人探聽外間消息廉訪此輩動靜團內村堡夜晚巡防日間並須瞭望有寇即捕有警即救行軍之要最重耳目耳目不周形同聾瞶諸事雖備難免蹉失瞭望所以明其目探刺所以達其聰此爲要務不可玩忽有能探望得力團中因而收效

者予以厚賞漫不經心以致誤事者必遭重罰夤夜捕賊會哨均須申約警號方免迷惑今將著定口號以及鐘音烟火等號另單密傳傳到之後即望各團首領照單謄寫分給大小牌頭緊密收藏用心熟記一遇有事耳聽鐘音目望烟火若在夜間兼以口號傳與同人庶不致誤此次所布各條並望團保時與牌長鄉約以及衆人疊次講說務令詳記尤望殷勤課督期其實行始爲盡職毋負民望

以上六條誠爲當務之急居今日有事之秋吾鄉安危繫乎團吾團效力貴乎豫備豫備不早後憂何及易曰震不于其躬于其鄰商洛之事已可寒心我團中花戶無論貧富俱有身家而辦團諸人更有關係懲鄰恚患可不早防果能齊發猛省力圖奮發盡知以團爲家必無遺誤同心同力是訓是行堅壁清野以待敵摘伏發奸以禁暴有恃不恐有備無患一境

獲全未始無望若猶泄泄沓沓心存倖免忘其身以及其家甚至私意挺生異論蜂起竟不知辦團爲何事且不知禍患迫在眉睫依舊迷亂尙何亂之能禦也夫今日寇禍已迫令在必行倘再玩愒定按軍紀其各共諒苦心幸無負此諄意是所望焉

設防四則

民國五年

爲通傳事照得近來外風不靜農事已暇極宜修我團防所有設防事宜特開於後

一凡守城者於城外周圍緊要去處酌量挖掘戰壕數處相其地勢務使人之進退便捷安全得與後面城壕相接切不可離城太遠以免彼賊人偷據接到此傳即於本日下午興工不可延緩

一各處破爛城堡趁此農暇應由團保責成鄉牌即時倡率修補並將議修情

形限五日內先行來報

一各團操演前已通傳辦理今再通催仰於每月常操之外仍照前傳認真加期演靶惟須預防軍隊過境宜先在城樓安置瞭望之人若有軍隊遠來即暫行停止撻鎗祇操別藝如掇鎗演刀矛之類俟軍隊過去再復演撻鎗等事

一守城打更瞭望諸法前已屢傳今再切令加緊辦理萬不可誤現在農暇並應於每晚輪派得力人丁出城巡哨最有深意切不可忽畧黑夜出巡頗易人不在多五七名八九名即足治事

以上四條均要實行今當湯火之際不比往常若再玩誤定行責罰病體無多語諸君注意爲幸

第四區團章程

民國六年

爲發曉事照得地方不治由於政事廢弛風俗不淳由於教澤陵替天下之本在於身王政之端造諸鄉周官鄉里之制本聯合兵農禮樂政教刑罰爲一貫近代鄉團之設亦不能分視稼穡兵戎文德武功爲數事本分所舉辦團務之初理當求宜民宜人之治今將仿古隆規躬親巡布安輯撫御擘畫經營崇德擢賢明倫教稼訪絃誦之聲歌課操防之實際平其爭訟正其風俗修明庶事察問疾苦一切詳咨次第籌舉謀救時之切務求端本之良圖合先將周巡大意臚欸告知所望各團諸君子共體時艱同思救濟視作切己莫當閒圖紳耆團保倡導於先花戶齊民奉行於後以次設施各出頭地庶本紳等按臨到時有所措手不至茫然自茲以往共期厥成雖未能化民成俗或可以邇治保安推行至易莫謂繁難切切此告

一曰崇德舉賢各團中有通德耆儒務須詳告本紳週巡所至親禮其廬就而

問道歲時存問贍其空乏鴻才碩彥拔舉登列

二曰任能授事各團保正團長以下人員週巡所至察其賢否而進退之闕者補之

每團添舉勸農員一人勸農課桑每村堡舉司耕一人協理其事

每團添舉鄉老一人掌司教化詔明人倫每村堡或每方添舉司化一人兼充司諫之職佐鄉老行教化勸民衆遠過失

仿藍田呂氏鄉約法每團擇舉讀書知禮者爲約正約副值年各一人試行鄉約之法職不必備有其人則專之無其人則兼之苟無兼者則姑且闕之每團添舉調解員正副二人調解鼠雀之訟

每鎮添舉市正市副各一人掌司整理街市風規

三曰清釐戶口別有冊式詳晰造報據所造報查其丁口之數執事生業老幼

強弱一周知而悉識之以爲行政之本隨其所至撫輯綏懷詔以善道有染汚俗者召而教之

四曰勘查疆域凡所管境內川山夷險道路通塞城堡完破人烟稠稀一一詳察登記飭由各團保繪具各團圖說各支所總繪數團圖說隨冊送呈

五曰勸農課桑週巡所至董率各該團所舉勸農司耕人員親履田畝察其所作勤惰禾稼異等者酌予褒嘉荒蕪不治者詰詢究處惰農傳責遊手重懲並謀安置

農功開時早作晏息司耕課之有不早起者與不事事者司耕責之

宜蠶宜桑之地勸令樹桑育蠶勸農司耕人應爲籌畫樹桑之所以隙地屋邊牆下地頭爲宜

雜樹菓木宜栽者勸令乘春廣樹

牛馬飼養不如法者罪之糞土稽薪堆積不如法者做之阡陌道路不平坦者飭令治之

勿種罌粟

六曰通商惠工週巡所至董率市正市副親履各市查察如有奸貪壟斷者設機賺騙者虛冒市價欺誑老幼者濫惡貨物表裏不一者斗秤大小不法銀色錢數折短者作奇技淫巧以無益害有益者當市鬪毆者皆主治之

七曰敦重人倫父子有親君臣有義夫婦有別長幼有序朋友有信爲人倫大道孝友睦婣任恤爲萬民德行躬率鄉老司化諸人隨地講明導之使行父不得逐子姑不得虐媳子婦不得私財貨父母正命不得違奉養不得缺言語不得忤父母操作子弟不得安坐伯叔父母敬事如禮

兄不得凌弟不得霸弟產業弟不得毆詈兄嫂財物細故有讓無爭服食坐

走必後長者鄉黨高年必恭敬之

妻不得詈夫夫不得縱妻閨門以禮無故不得輕出

團中首領不得以非禮犯之首領正令不得違正差不得諉執事必忠敬持身必端正爲首領者誠信必孚下恩澤必逮下爲團民者必忠順其上捍衛其上

朋友相交必敬必誠必信勿交匪類勿稍欺詐

宗族必親睦毋有爭訟

姻戚必和好毋輕睽離

八曰興崇禮教冠婚喪祭之禮力能行者行之庶人之家四時必祀其先以春分秋分冬至夏至爲期清明拜掃季秋祭父忌日上食禮數隨人厚薄稱物報本追遠此其大節喪事不得演唱婚事切勿囂房所舉約正約副如能實

行鄉約之法月吉會集講明古人立法之意德業相勸過失相規禮俗相交
患難相恤有呂氏成書可遵

鄉老約正均有教化之責如能以暇日躬率子弟演習禮儀歌誦詩章使民
觀感於雍容揖讓之際以潛消其鄙吝悖慢之情承古人禮樂化民之遺意
斯所望於君子

九曰敬教勸學村堡必有塾子弟必讀書應有塾而無者該團首人速爲籌辦
應讀書而不能讀者該團首人妥爲設法週巡所至按臨學塾審其師資考
其隆替閒爲講解經義明其要旨師必敬業徒必勤學父兄必敬師長反是
者咎之

半日學堂原爲農民識字以及無力讀書者而設應令各團首人各就地方
情形酌度辦理

十日規正風俗凡民男女各勤職業早作晏息不得遊惰衣服器用務崇儉約
服飾不得奇袤婦女切忌華粧青年婦女不得赴廟會燒香看戲不得恆坐
街頭不得潑鬧街巷

男婦不許賭博骨塞牌寶俱作賭論

家戶門庭必清潔器物必齊整街巷勿穢污

街巷不得穢語男女不得混雜婚嫁不得重財

各安本分毋作非爲勿招匪類

事有齟齬求直官人不得私相爭鬪

勿恃強凌弱侵欺良懦勿倚富吞貧盤剝產業

見尊長必恭敬處同輩必遜讓遇卑幼必慈仁

出入相友守望相助疾病相扶持有無相通患難相恤貧富相調救

興仁講讓體信修睦六十以上力役不及身

十一曰慎固封守城垣有修築之力者築之有修補之必要者補之私宅牆屋破缺促葺理之家戶必畜犬堡內必有人守更城外必派人巡路城門必置守巡更必數人城上必置瞭望者勿招賊盜勿容奸宄柶鑼相警緩急相救可以小安矣

十二曰整飭武備操防之法另訂專章目下先就各團舊日操法認真操練務求實用所需器械先就現有鎗刀修整使用仍一面籌添利器精進操法按閱所至驗其優劣分別殿最酌行賞罰切不可忽

十三曰聯絡指臂各團地段某處與某處如何區分某處與某處如何策應應俟按臨到境與各團首人就各處地勢夷險道路通塞情形酌量擬定開單送局以資聯絡

十四日平息爭訟民間鼠雀細故先投本管鄉牌解和不能解和者轉至調解員處息不能息者轉至團保剖決猶不能決可至團總本紳按臨到日若遇尋常細故仍勸各歸本團總處理必有大故不能決者然後親行按問務得其平以期無訟

十五日彰瘴善惡各團中孝子慈孫友兄悌弟義夫節婦實有行誼者辦公出力捐資濟衆懋有事績者週巡所至採訪記錄敬而禮之褒贊激揚錄取事蹟交存局所轉詳官憲請議旌表登庸其有庶頑讒說亦即廉錄籍記召而教之至再至三格則承之否則威之

十六日矜恤惻獨凡團中寡婦孤兒老病無依者首人體察設法存恤賣妻鬻子急難迫身者設法救濟無主孤櫬設法掩埋以上三者或由親鄰設法或由公衆辦理各審其宜

十七日救時急務年饑民貧缺食甚衆官賑尙需月日若有貧極斷炊無路可生者應由各團紳保體察情形勸導團中有力之家量力通融先儘親族後及鄉鄰或借資本俾其謀生或借食糧令其糊口立約作價熟後歸還官人經手不許拖欠即由公欸內借給者將來亦須收還此乃種德之事名實雙收暫借仍還於己無損苟能善勸想有力者必樂爲也

(附條)二春禁打飛鳥

十八日善後長策地方賑貸除應歸還富室者無論矣其有由公欸內借給抑或由富室義捐者將來收還之後即作該團社倉存儲本地遴舉正紳經理中稔息借大荒賑饑歲有增益足繫民命

其有收存銀錢者亦可作爲惠民之資遴人經理周流出借收其微息積成鉅數不但可助積貯並可藉以興辦學校及裨益地方諸要政此則存乎其

人不必盡同者也

十九曰博採輿論周爰諮諏古之善教除由區所宣書求言外週巡所至隨地延訪耆紳耆儒閭閻父老諮詢利弊察問風土人情團務得失導之使行擇善紀錄存於區所詳閱采擇而措施之

歌謠善惡風俗見焉亦可採之以鑒得失

二十曰考課成功以上所布條教與其他應舉事件週巡所至均須考成上自紳耆團保下及鄉牌花戶有能實力奉行日起有功者立即嘉獎屬下受褒榮及首領如有怠惰頹靡面從背議不肯實行者即予懲儆細民決責團保黜罰

以上諸條雖就周巡敷布所宜施措者舉其大畧然庶事之常實不外此引伸觸類以盡其詳則在乎共事紳耆團保諸君子同心同德實力倡率

隨時增潤使井井有條事事克舉雖費一時之勞苦可肇永久之平安實企望之願共勉焉條目雖多精神一貫苟審其緩急先後之序而徐圖之則不患其繁矣察民之情因勢利導由淺而深行所無事則亦不憂其難矣

門禁規則

民國六年

一城門重要理宜嚴防每日由隊長輪派隊丁守衛務須謹慎小心或坐或立務須整齊嚴敬並須不時登城瞭望四外更須不時出城數十百步探望旁遠伺察非常有欸即報不得稍有疏忽違者定行責處隊丁出差即由保正派人填守晚間並由保正添人幫助交替定要接續如果門衛間斷查出定行重責

二早晚開閉城門最要提防奸細每早黎明開城之際當由守門者先啓門樓

周圍瞭望平安無事然後啟關黃昏絆鎖更要謹防冒進一更以後即行實封斷絕行人如有外來喚門之人須問明姓名事件聽知聲音登樓窺清外邊動靜然後報局請示許進給鑰方可開門引進不得擅行放入違者責處

三不拘早暮無論官紳軍民何色人等不得擅入城門即有要事須先由隊報局請示許進然後引進不得私行放入亦不得令其獨自來局並不得攜帶軍裝如來人帶有隊伍只令爲首者進城其餘悉令留駐城外若許帶進幾名然後放進幾名違者定行責處

四或有來堡探望親朋之人亦須隊丁喚令主人認明來歷許進而後納入仍不得挾帶軍裝如果行止不正即無軍裝亦不得放入違者責處

五守衛隊丁每日須常到城門外梭巡如遇面生可疑之人或係過路或係來堡均須盤問若有可疑即行留止報明請示倘或漫不經心以致奸細窺伺

定行重責設若來人強行闖入立即拿治不貸

六凡有販賣瓜果菜蔬之人概着於城外擺列勿令入堡乞討化緣賣藥算命之流一概不許進城違者責處

以上六條務各敬慎遵行毋稍疏忽取咎切切此囑

清查戶口造冊辦法

民國六年

一首頁先畫地圖將一團所管村堡坐落方向相距遠近道路聯貫詳繪明白後附圖說載明所管地方大約南北數里東西數里四隣接界係何團名一每堡之首畫一城堡圖形城門幾處巷道幾處人家鱗次一一標注家主姓名

一造冊之法每堡先書堡名下註城門某向城內幾巷或南北巷或東西巷

一鄉約某姓名作一行寫

一編戶之法須就城巷內由左而上由右而下挨戶順寫不得隨意參差

一每家填寫家主姓名須真正管家事者不得以子弟頂寫至其父母妻子年
歲生業身材房地牲畜鄰右另有冊式均須逐一照寫不得再襲舊式祇以
男女大小幾口籠統了事至於不正之人名下不必填生業當用暗記大匪
畫米小匪畫乂竊匪畫△通匪畫┆窩匪畫○家內人口有在外者亦須上
冊並須註明所在地勿得疏漏

一每堡戶口冊之末須載明堡內若干戶男女共若干丁口

一每團戶口冊之末須載明團內若干村堡共若干戶男女若干丁口

一每支總共管若干團須加繪一大地圖並造一總數冊祇載某團共若干村
堡共若干戶共男女若干丁口總共若干村堡共若干戶口

戶冊爲團保之根據不比尋常務望各團保正督率鄉約親身挨戶查明

人口年歲身材生業房地牲畜鄰右等項照家填寫一堡不得遺漏一家
一家不許遺漏一人一人不許遺漏一事此爲周知地方情形以利保安
起見並無他意萬勿疑慮隱瞞亦勿憚煩而苟簡冊成之後隨便抽查有
一不實定惟該保正是咎言出不虛切勿玩忽限半月造齊慎毋延誤

隊棚條規

民國七年

爲頒示條規事照得團練實準古之鄉兵教令首須明備茲爾隊棚設立實司
基本衛守之任除剿撫調遣另有指示外所有在城戍守巡防一切事宜合
行頒示條規以資遵守爲此示仰在隊人丁一體恪遵愛己懷刑忠奮自勉
庶幾衛己衛人名實俱永無負食祿忠事之義有厚望焉切切毋違特示
一在隊人等首當奉公循法服從命令散丁服從隊長隊長率之服從上命層
層節制不得違抗若有不遵約束不聽指使者必責無貸

二在隊人等務相敦睦敬長尙賢讓甘爭苦師克在和衆志成城敢有徇私占勝凌競同列必予責懲鬪毆喧譟或犯上者重加責辦

三在隊人等務須恪敬職事早起遲眠整齊衣服清潔內外勤慎從公敢有荒怠放縱奉事不謹者必予責懲局內門外以及城門守衛處所失於輪掃者責坐值日并咎隊長

四在隊人等雖其室家皆在本里然有事故回家必先告知隊長稟候核准而後得去敢有私自回家定予嚴責即或准號離棚而不依期來歸亦必究詰

五在隊人等務須慎守規戒毋作非爲敢有吸煙務賭以及邪淫不正諸事必予嚴懲若更有偷盜子藥私販軍械輕則加倍科懲重則身命難保其各凜遵罪犯不宥

六在隊人丁每日早晚必由隊長點名一次總團亦不時派人點查敢有不在

棚者必予嚴懲夜不歸伍更予嚴究重辦

七在隊人等槍械爲其命脈必須寶愛護持時常擦利敢有漠不經心以致銹鈍滯澀或有損傷破壞定予懲責

八在隊人等操練是其專課早晚演鎗撥鎗不許空閒曠廢敢有無故曠廢或不用心操練者定必加責軍務稍暇即用土鎗演習打靶務期命中不勤不敬者亦必切責

九在隊人等守衛城門最爲緊要無故不得隨便散走遠離城門以致門前人少槍械必須在身不得隨便置放又須時常遠望見有人來即時持鎗立整勿得散亂懈弛有生面人不許近至城門更不許託故歇息緊防中人奸計有欲入堡探視親友者更須仔細端量喚其親友認明然後得入勿遽信其甜口懶於喚認而輒令其入城是爲切要

以上五條倘有不遵告誡違犯其一即予嚴懲因而失事更加重責甚且處以極刑隊長平日不能率導亦予應得之罪

十在隊人等每夜輪流在城巡更協同堡衆謹慎防守通夜不睡每更吹號二次

堡人擊鑼

周圍遊走靜聽城外有無動靜敢有躲懶偷睡或守而不遊或遊而

不靜心遠聽以及號聲間斷忽有忽無者一經察覺定予嚴責稍有失事定以軍法從事兼罪及于隊長慎毋輕忽

以上十條詳察恪守隊長率之於前隊丁隨之於後倘能勤奮有功定必加賞若或倘矩越規勢必懲罰言出法從團法無戲其各凜遵毋致後悔

條禁六則

民國八年

爲通告事照得近來我團人民行爲多有不當苟不及早教詔及陷於罪從而刑之夫豈仁人之宅心用是特發條禁昭示有衆其各凜遵無自蹈於非法

是所至望

一 無賴之徒出外爲匪者必誅

一 無知子弟投入匪夥責其父兄趕即喚回准其無罪依違不喚定以故縱子弟爲匪論罪鄉牌不阻不報并罪鄉牌

一 我團人民與外團人民交涉事故祇許投團投縣報請處理倘敢私邀軍隊藉勢欺人壞亂團法虧損軍譽定行嚴懲

一 凡軍營與外團人民銀錢交涉我團人民無論有無情面俱當安守本分聽其自行周旋不准受人請託從中關說免致自貽後患如敢故違定懲不貸

一 我團地狹人稠嗣後團人變賣莊房產業祇准賣與本團人民倘敢貪圖重價私行賣與外面莠民致貽後患定將賣主及中管一律嚴懲并照其價處罰鄉牌不阻不報并罪鄉牌此係各團公議最爲重要莊房尤甚

一各團人民招客住居必先報明鄉牌團保層層查知定其可否倘敢私貪重利私招住客不行通報或招住已定而後報者定即從嚴懲辦并照其價處罰所招住客若不正當致於團中有干礙者加倍重懲鄉牌不阻不報并罪鄉牌

以上六條各宜恪遵永久勿犯實與團中安全有莫大之益倘敢自圖利己不顧全局定必執法以繩無可容宥切切特此

值年春令四款

民國九年

四團知照現當春令理宜布行慈惠之政以順天時而慰人心其事如下

一體察窮民乏食者即由社倉項下酌量借給食糧並勸令富家量力調借

一體察境內有停滯未葬靈柩催令趕清明節一律埋葬無主者公中籌款掩

埋

一每家按人口多寡之數每名課栽雜樹一株菓木樹爲上其餘無論楊柳槐榆均可

一嚴禁執鎗者撻捕飛鳥併禁童子戳毀鳥巢

以上四條即由各團抄錄一張自行遍告花戶仍一面自擬告示多多張貼庶得觸目不忘

鑿井灌田規程

民國九年

爲通告事照得救荒之道理宜先事籌備今麥田歉收天雨無期亟應早爲籌備以濟時窮大抵救旱之策莫如井井養之利歷有成績徒以鄉農散渙莫能齊一勤者自勤而閤者自惰因循畏憚藉口支吾功令雖頒監督無人以致遷延坐誤自失事機及夫旱久食竭物力已匱雖欲爲之而勢已不能束手待斃浩歎曷勝今我有衆咸聽告言天災已迫世路方屯苟不及早圖謀必致窮蹙

莫告米珠薪桂將來之升斗曷求本團總夙夜縈懷爲我人籌至計莫如大修井利彌縫天闕事在必行理無或異其各猛醒毋事推延所有計畫詳具後方各保正團長負有地方之責即望大啓仁心躬率鄉牌傳集花戶悉心詢察所有貧苦農家共若干戶每四五家共置一井每井溉田十餘畝澆秋澆麥即可補度飢荒有井砌舊無者鑿新限五日內一律籌定開單報來或新或舊統限本月底一律成全六月朔溉種秋苗瓜豆之類九月盡則我稼同矣規畫既定即於每團中擇其真誠熱心曉達事體者各舉井養董事一人酌給脚費專理計畫濬鑿灌溉一切事務上接保正團長下接鄉牌花戶親歷鄉莊隨便商權決其疑難授以機宜易其鄉約中不得力者仍由本團總等加派勸農大紳流覽考察以總其成斯續命之方活人之術所賴實行萬勿虛應爲首諸人果能實心實力是訓是行將來歲稔之日本團總當躬率鄉農論功酬庸保正團長

擇優酬贈匾額鄉牌擇優予以獎勵若其虛僞爲心成效毫無更有儉人簧鼓造言惑衆以致貽誤民生者必以團法相繩生命所關賞罰非戲其各策礪毋貽自悔切切此告

一有井之家每家澆秋苗數畝水有餘力分惠及鄰藉其井與其地各澆秋苗
二三畝量水之力定其家數務在均益不得專吝然得收取田租

一無井之家各就鄰井澆種秋苗二三畝按畝出租數家共藉一井不得偏擅
此係公法非由私惠勿執硜硜之介退縮自誤

一無井之處有能專鑿一井者自灌之外仍須分惠及鄰富而好義能於己地或鄰地自鑿一井聽鄰人澆灌或借給鑿井之資慷慨不吝者公中獎予花紅仍計所費將來作爲賑捐抵算貧苦無力之人若數家擬共鑿一井而費無所出者先就本堡富家勸借無富家處中公中量爲籌助稔後交還此須董

事鄉牌爲之經畫保正團長爲之籌給倘四五貧家共成一井則可賴以生活所需之欸另有專條

一前議籌備賑倉此時即須將麥按股催收存儲公地以後貧家鑿井之資董事脚力之費即由此內取給

一本團總現擬延請勸農大紳攜帶二人巡行考察興發井利自五月十五日起每團應各出麥五斗交給總處備發脚薪之費亦由各團賑麥內開支約計兩月之後事竣停支

一灌地之法宜倣古人區田遺意用王豐川先生簡便之法不論地之長短規畫爲區每區寬一尺五寸其長通畛每隔一區種一區所種之區挖深一尺爲溝每長一步之間用糞三升有奇土糞和勻布種其內以手按實苗出後視其稀稠酌爲去留鋤不厭勤旱則澆灌苗漸長漸以隴土鋤壅苗根不畏

風搖可得美收倘人工精到每畝足收穀六七石宜做試之古法本是畫地方一尺五寸爲區每區挖深一尺隔一種一今既變爲通畛之溝若能於所留之苗每隔一尺五寸之間鋤斷一半尺之地使其透風即合古人方區之意但此等種法布種須令滿溝不比尋常農田稀疏每方留苗若干未曾親試善農者以意講求可也若能於灌地二畝之間一半種稠一半種稀將來收成即可定其優劣至於瓜豆之類種植隨宜茲不贅論

以上六條大端畧具潤澤在人鄉里之情每議井泉必有許多推諉或以爲獨力難舉或以爲衆心不齊或以爲無地可井今既通其變而濟其窮可無憂矣至於墟土水鹹原地難井以及吝惜井費緩待天雨之說須再闢之夫墟土水鹹原地難井何不商諸團保董事擇川地之黃土而可借者鑿之縱使無地借鑿可就鹹水之地飽壅灰糞即能免地甲之病雖或

苗質甚劣終竟勝於無也若夫天雨之期人孰能料與其後種而失時何如先種遇雨而益茂開一井甯不過六七日水甜則砌否則棄之所費幾何何憚而不試故今日之計寧使爲之而弗效不可諉置而弗爲必須先種而待雨不可使有雨而無苗以此代賑事半功倍倘不以汲井爲務者決不以賑貸及之休戚之機於此決矣禍福之門惟自擇焉

善俗大綱

民國十年

一曰家族之教

家必有主修身齊家父慈子孝兄友弟恭夫義妻柔姑慈婦婉居上克明爲下克忠所求乎朋友先施之

族必有族長一人主統率族正一人主治理族師一人主教化分居各堡者五家以上舉戶長一人主其治教屬於族長不及五家者隨衆姓統於本堡

鄉約

二曰鄉里之教

每團立講授員二一正一副立講說課授主董理員無定數即以團保總司之

以各牌牌長鄉約分司之每堡有讀書識字能講解者加舉一人為分授員

主授讀所講所讀者首弟子規次孝經次小學節要事不越乎日用道必本

於彝倫每月逢操講二次中間再加一二次

三曰團司之教

總團依呂氏鄉約遺法立鄉約總會統率團人每月會講一次講明法令公

約以及家族鄉里應盡之道旌別從違行其勸戒以期有效

各團設立鄉約分會即依總會之法推廣實行

旗制民國十一年

各團通覽照得各團旗幟向來隨便藉用均無定色今擬定方色大小式樣開列於後通行照辦傳到仰各照畫圖形一紙並錄本團旗色存留製辦仍將原函速轉前途可也

計開

富平東四團第一屬

知新團

黃心紅邊

火生土也

富平東四團第二屬

維新團

藍心黑邊

水生木也

富平東四團第三屬

時新團

紅心藍邊

木生火也

富平東四團第四屬

志新團

黑心白邊金生水也

富平東四團第五屬

禮新團

白心黃邊要深黃色
土生金也

此旗專爲合操及有事出隊而設平常事故不必使用免致污舊設或本操不能齊備務趕下月初間合操備齊可也切切此傳

旗式

正身長五尺二三寸邊寬七寸火燄

正身寬四尺三寸

社倉章程十條 民國十一年

積貯者民之大命也昔之倉儲聚乎城邑後漸屯於鄉鎮今以時勢所限而爲權宜之計儲之村堡俾民各自爲謀庶遇凶荒稍利賴焉然須持之有道處之

有方始可以奏效而持久全視行之者如何耳茲擬章程如左

一此倉之設即本朱子遺意定名鄉里社會儲於各村各堡其三五零家不成村落者附入別堡民積民用專爲備禦荒歉官府總司其成惟不作爲公廩其一切營署支應俱當由保正攤湊不得挪動本倉以昭限制

二經理之人此倉關乎民命事雖小而關係實大自非專舉安人經理不可尤非鄉保紳耆層層監理不可今擬三層經理於下

(一) 創辦之初村堡大者每十家推一甲首每四五十家推一社首

貧富均計每

村堡公舉廉正二人爲倉董副村堡小者祇舉管倉首副二人明通者司賬務殷實者寄儲糶會同鄉約攤收選擇安地存放鄉約可靠便舉鄉約充當其或另舉他人鄉約亦必經手藉其公柄以資催收方無滯廢

(二) 本團保正有領導之責應各責成該團保正實力董率各鄉約原始要

終綜其出納之數知其聚散之詳以會於監紳而達於官府

(二) 每四五團或六七團加舉賢正監紳監其始終未成責其速成已成令其妥善收發啓閉亦必聞之大稜賑貸尤必蒞之尋常無事每春亦當查驗一次如有不合即行稟請究治

以上諸職實寄一方之命膺此職者當思勉盡乃職方不負此重任苟或漠不關心疏忽遺誤不惟害及災民勢必孽集其身而殃及後嗣前車不遠可爲深戒至其勸懲之章別具於第十條

三 湊集之法以各村堡戶口爲準每處有民十家即備麥糧十石以上有民百家即備麥糧百石以上豌豆亦可多備爲佳每戶能備至一石五斗或二石方妥其攤收之法各按村堡地畝核計務足所攤之數地畝人數不能適均勢必稍有參差不得爭多較少強求一致以此收數作爲本麥出則貧富均

出領則貧戶獨領而仍酌取微息（具詳後條）待經營日久所收息麥過於原儲三倍之後即以本麥還歸原戶亦可願捐出者許之捐逾十石鄉酬旌物捐逾五十石官給旌獎一鄉戶口貧者不過十之三四以十家之所出贍此三四家之饑食當可以延殘喘擴而充之雖奇稔亦不能爲害矣

四聚散之節此倉原備大稔不在小惠尋常春借夏還事非不美但倉係新設所積無多而人情不齊民權易藐中稔乏食之家又多無賴之輩散易而收難稍開其端爭相效尤一遇小歉變爲大饑無可再發反誤民命今擬三法

限制如後

俟後來稍蓄盈餘然後別論

五中稔之年即有一二乏食例不開倉倘遇春糧過漲而麥苗蓬勃可望豐收不妨糶陳易新以滋贏餘且防紅蠹價平則否即其糶也亦須集衆公商轉請允唯方許行之不得一人一堡擅自私糶并不得冒昧誣空倘忙後填買

不起定令首人責賠以防流弊

六小歉之歲夏秋薄收冬令麥苗雖種而未穩人情尙不甚急毋許開倉春間麥苗倘是薄弱仍不可以開倉必視雨落苗起確望中收方可公議請准借給貧戶領食指質取保忙後交還不領者聽還以溼惡者責至於起息當視糧價糧價不甚軒昂則令於忙後每石加還息麥二斗領豆則息亦豆倘忙內收成太薄量予減息一半屆時斟酌此常法也若領時糧價過昂忙後料必大減人將視爲利途紛起爭角反壞大局則當令其照時作價忙後依價折還新麥不再起息此變法也二者各視其宜而行之

七大稔之年理應開倉但必俟情勢既急官府議賑之際事可通行然後請而行之不得開放太早以免極困之時反絕糶糧尤必須監紳臨視團保經理以免弊竇紛紜此際領糧固應作價但其價必與異日大相懸殊雖曰市值

非所以恤窮民也應俟年豐催繳之際量爲核減或以一斗還數斗或以全價折數成公同商榷或請上憲規定畫一章程事前無須預定所以恤災黎於劫後並以防貪競於當時也至其如何審查貧富之法以期無濫無漏均待臨時籌商茲不預議

八雜費之需創辦初年所費無幾應令隨時籌措倘積散有年獲收滋息許其於息麥息錢項下公議酌提若干開支收發翻曬以及困席等費不得動本每年正月由經理者備具酒食召犒在事之人以酬其勞年終則集衆算明帳目張貼清單

九簿籍之設創辦之初統置流水帳簿一本以爲出入總括之數仍將當年所收本麥花名存錄一簿後日借放收還花名存錄一簿其收支雜費別爲一簿均於年終同衆結算一次俾衆共曉收支分明不得蒙混又須將一歲錢

糧收發簡明總數與保正開送一單保正總具一團之數與監紳開送一單
監紳彙總報縣存查遇有更替照帳盤交

十勸懲之章司倉董副及鄉約果能經理有年勤慎無誤收息充盈荒歉賴以
賑貸民得實惠者臨時由保正報明監紳在於息麥項下酌予賞賚或贈送
匾額監紳保正果能經理有年其效卓著如上者屆時報請官署酌予旌獎
其有忽視民瘼敷衍欺飾平時既無實績臨事貽誤民命更或作奸舞弊蠹
朽侵虧大悖人天者一經查出或被告發定即從嚴懲治扶同徇隱並予究
懲決無姑貸

以上十條審時度勢量其可行者酌爲定擬雖未詳備而大致已具於此至
於法所難周地或有異如何修改則有俟乎君子抑周禮司徒教民平居有
任恤之條臨荒有安富之舉自晚近人情衰薄富者不務恤貧貧者惟知忌

富一遇饑荒劫奪流離禍亂相尋貧富並受其殃公私交承其敝即經理諸君苟不善爲之謀他日豈能宴然無事今茲立法雖意在救貧亦即所以安富富者切勿吝惜貧者亦勿漠視相濟相安乃能共存況饑歲之食如珍苟不早自爲謀坐待臨渴掘井粟豈易得哉光緒丁丑之劫戶絕十七可爲殷鑒幸各致意於此斯民庶有賴矣至於積之既久獲息充贏則地方一切善事皆得藉是而舉此又後望而其效不僅於如斯者也佇翹成績不勝額手